


भागवत दियां कथां

श्याम लाल शर्मा



श्रीमद्भागवत् दियां कथां

श्याम लाल शर्मा

SHRIMAD BHAGWAT
(Tales in Dogri)
from Shrimad Bhagwat
by
Shyam Lal Sharma.

● प्रकाशक

श्रीपति शर्मा

श्रीपति प्रकाशन, १६५ विजयगढ़ जम्मू

● मूल्य

Rs. 14/-

● पहली बार १९६२

● मुद्रक

आर० सी० प्रिंटिंग प्रैस,
अप्पर बाजार जम्मू।

बाल-भागवत

डोगरी भाषा'च बाल-भागवत दा ए स्वतन्त्र अनुवाद डोगरी'च बाल-साहित्य दी कमी गी दिखदे होई, इक बड़ा सराहने जोग जतन ऐ। डोगरी गी साहित्य रूप देने आलिये परिस्थितिये'च भाए साढ़े देसै दी राजनीतक ते समाजक क्रान्ति गै प्रमुख थार रखदी ऐ, पर अज्ज जेल्लै उस युगै'चा निकलिये डोगरी भाषा अपने साहित्यिक बोद-बिकासै गी साम्बन-सम्हालन लगी ऐ ते कन्ने गै अंगली बत्ते पासै नजर पुट्टिये दिक्खन लगी ऐ तां उसी अपने ओ अंग टकोदे लब्बन लगे न जिन्दी बोद रुकी रेई ऐ ते अज्ज उन्दे बारे'च चिन्ता ते जतन करना जरूरी होई गया ऐ। बाल-साहित्य बी एदे उने पिशड़े दे अंगे'चा गै इक बड़ा महत्वपूर्ण अंग ऐ। इस अंगे पासै खुशी दी गल्ल ऐ, जे डोगरी दे साधकें दा ध्यान गया ऐ। ऐ कभी उनेई मते बारी अक्खरी ऐ ते इसै करी उन्दे'चा कइयें टकोदे तौरै पर व्याखे आस्तै गै किज पोथियां लिखियां नइह

इन्दे'च श्री नरेन्द्र खजूरिया दियां दो पोथियां—“अस भाग जगाने आले आं” ते “रोचक कहानियां”—बड़े सराहने जोग जतन न ।

लोक-कथें दे दो संग्रह बी व्याणें-सयानें दौनें दा मन परचाने आले निकले । कहानियें दे संग्रहे'च छपी दियां कहानियां सयाने जागतें ते सयाने गबरुयें दे गै पढ़ने जोग न । विच २ कोई-कोई कहानी भाए' लौकी श्रेणी दे जागतें दा मन बी परचाने आली निकली आवै । “पहला फुल्ल” ते ‘सुई तागा’ दियां कहानियां व्याणें दी सोचै दे धेरें'च समाई सकने आलियां जरूर न । पर अज्ज जेल्लै प्रेमरी जमातें'च डोगरी गी इक लाजमी इस्त्यारीं मजमूनै आंगू पढ़ाने दी योजना गी फी मुड़ियै नमें सिरेया चलाने दी गल्ल चलै करदी ऐ तां पहला सवाल इयै सामनै आइन्दा ऐ जे महकमे पासेया छापे जाने आली रीडरें थमां बक्ख होर बाल-साहित्य कुथें ऐ ! तां डोगरी दे साधकें पर पौने आली जिम्मेदारी गम्भीर होई जन्दी ऐ । इसै गल्लै गी दिखदे होई में डोगरी'च बाल-भागवत दे इस डोगरी अनुवादै दा स्वागत करना, ते कन्ने गै इन्ना नवेदन करना बी अपना फर्ज समझनां जे डोगरी दे सबनें लेखकें-कवियें गी ए बाल-ऋण चुकाए बिना सन्तोष नई' करना चाइदा । धेरें'च सयाने लोक व्याणें गी पहले खलाई-रजाइयै गै आपू खाने दी दी सोचदे न अज्ज डुंगरै दी धरती दे व्याणें दी साहित्यिक भुक्ख टकोदी पनछोने जोग ऐ । ओ इस भुक्खै कन्ने अज्ज सादे पासै दिक्खै करदे न । डोगरी साहित्य दी वरास्तै दे

असली बारस बी ते इयै व्याणे न । इन्दे च गै कईं कवि,
 कहानीकार, उपन्यासकार ते नाटककार होने न, इयैने कोमल
 और अज्जै तगर साढ़ी बदनसीबी करी, पता नईं कुर्थे २
 उसरे ते हिरखै दे पानी गी तरसदे २ गै सुक्की-भुरी गे । शुक्र
 ए जे दसें-बीए' साधके' इस सोके'चा वची निकलियै क्यारिये'च
 बिन्दु सैलतन खलारी ऐ । अगें आस्तै नमिये पनीरिये दा
 सिलसिला बनाई रखना अज्जै दे डोगरी लेखके दी जिम्मेदारी
 ऐ । आओ, इस जिम्मेदारी गी अपनी अपनी थवीके मतावक
 नभाने दा जतन करचै जियां श्री श्याम होरे' इस बाल-भागवतै
 राहें नभाने दा जतन कीता ऐ ।

हवेली वेगम जम्मू ।

कत्तक पुन्नेयां 2019

(नवम्बर 1962)

—रामनाथ शास्त्री

भूमिका

श्री मद्भागवत साड़ा प्राचीन ग्रंथ ऐ। ऐ कथें कहानिएं
 दा समुन्दर ज्ञान, धर्म, नीति ते जीवन गी उच्चा चुकने आले
 उपदेशें दा भंडार ऐ। धर्म ते नीति दे गूढ़ सिद्धांत महात्मा ते
 राजा लोकें दिऐं कथें कहानिएं द्वारा बड़े सरल तरीके कन्ने
 समझाए दे न। धर्म नीति दे अलावा ज्ञान-विज्ञान बी एदे च
 इयां गे रले-मिले दा ऐ जियां दुहा च मकखन। ए धरती, सूरज,
 चन्त, तारे ते नदियां पर्वत कियां बने ते केड़े महापुरुषें दे जतनें
 कन्ने ए प्रगट होए—गल्लें गल्लें बिच गै ए तत्थ बड़े मनोरंजक
 ढंगै कन्ने इनें कथें कहानिएं च परोए दे न। अज्ज जिनें
 प्राकृतिक शक्तिऐं दे अविष्कारें गी विज्ञान दे चमत्कार आखिए
 अज्जा दे लोक उन्दी उपलब्धि गी अपनी अज्जै दी बड़ी भारी
 जित्त आखदे न ओ उपलब्धियां पराने जमाने दियां वड़ियां
 सधारण गल्लां हियां। अज्ज अस वेशक भगवान दे अवतारें
 दी कथा गी अलौकिकता दे भूठे ते कपोल कल्पित चमत्कार
 आखिए मखौल करी ओड़चै पर विज्ञान दे अविष्कार ए दस्सै दे
 न जे ओ दिव्य चमत्कार इयां गे स्वभौकी हे, जियां अज्जै दे
 हवाई जहाज, टेलीफोन, एटमबम ते परमाणु शक्तियां। फरक
 छड़ा इन्ना ऐ जे पराने जमाने दे लोक ईश्वर भक्त श्रद्धालु,
 परोपकारी ते वे गुमानी हे। उनेंगी अज्जै दे लोकें आला लैखा नां
 दी भुख नईं ही। ज्ञान विज्ञान दी हर प्राप्ति गी ओ लोक-कल्याण
 आस्ते बंडी ओड़दे हे जां परमात्मा दी देन समझिए ओदे
 अर्पण करि ओड़दे हे। गीता दा निष्काम-कर्म उंदा मूल मंत्र हा

जड़ वी संसार गी कुसै गल्ला दा कष्ट होआ उसी दूर करने दे जेड़े जतन होए ओ भगवान दी प्रेरणा दा फल मन्निऐ उंदे गे अर्पण करी दित्ते गे । धर्म दी भावना मुख्य होने करी अपना व्यक्तिगत स्वारथ हमेशा पिच्छे रेआ ऐ । ए साड़े भारतीय इतिहास दी सचाई ऐ ते साड़ी संस्कृति दी महानता ऐ ।

महाभारत ग्रंथै विच साड़े कईऐं जुगें दा सांस्कृतिक इतिहास कथें कहानिएँ च सांविऐं रखे दा ऐ । एदे लेखक श्री वेद-व्यास जी होए न । ओ पराशर ऋषि दे पुत्तर है इस करी उनें गी 'पाराशर' वी आखदें न । ठारां पुराण ते गीता इदियां गै रचनां न । इनें पूरा श्रीमद्भागवत अपने योग्य पुत्तर श्री शुकदेव होरें गी पढ़ाया ते उनें ओ सारा भागवत पांडवें दे पोत्तरे राजा परीक्षितै गी सनाया । इयां ए भागवत दी कथा-परंपरा कायम होई जेड़ी अज्जे तक चली आवैदी ऐ ।

इस बड़े भारी खजाने विचा 23 रतन कड़िऐ तुन्दे सामनै रखे न । मेद ऐ निक्के बड्डे सारें गी पसिन्द औडण ।

कल्चुरल-अकाडमी जम्मू-कश्मीर नै ए कथां दिक्खियां पसिन्द कीतियां ते छापने गीतै सहायता कीती । डोगरी जनता पासेआ उन्दा धन्यवाद करनां ।

15 नवम्बर, 1962

—श्यामलाल शर्मा

* अनुक्रमणिका *

1.	भीष्म पितामह	1
2.	नारद	11
3.	अश्वत्थामा	13
4.	वराह अवतार	16
5.	कपिल मुनि जी	18
6.	दत्त प्रजापति ते सती	20
7.	ध्रुव-भगत	23
8.	ऋषभदेव ते जड़भरत	26
9.	अजामिल	31
10.	राजा पृथु	33
11.	राजा प्रियव्रत	36
12.	भगत प्रह्लाद	39
13.	गजेन्द्र मोक्ष	45
14.	राजा बलि ते बामन	48
15.	मच्छ अवतार	57
16.	राजा अम्बरीष	60
17.	राजा हरिश्चन्द्र	64
18.	रामचन्द्र जी	68
19.	परशुराम जी	77
20.	राजारन्ति देव	81
21.	राजा शिवि	84
22.	मार्कण्डेय मुनि	87
23.	गंगा ते भगीरथ	90

भीष्म-पितामह

बड़े पराने जमाने दी गल्ल ऐ जे हस्तनांपुरे च राजा शान्तनु राज करदे हे । उंदी रानी दा नां गंगा हा । उन्न ब्याह बेलै राजे कन्ने ए शर्त कीती ही जे राजा रानी गी कदें कुसै कम्मा दा नैईं टोकग । जदूं ओ टोकग, अदूं गै रानी गंगा उसी छोड़िए टुरी जाग ।

राजा उसी कदें कुसै गल्ला नइंहा टोकदा । इत्थुं तक जे गंगा दे घर जेड़ा पुत्तर होऐ, ओ उसी भूट गंगा नदी च प्रवाई ओड़दी । राजा दुखी ते बड़ा हुंदा, पर बचनें दा बद्धा दा हा, चुप रौन्दा । इयां करदे २ रानी नै सत्त पुत्तर नदी च प्रवाई ओड़े । जिसलै ओदे घर अठमां पुत्तर होआ ते ओ उसी बी चुक्किए नदिया रढ़ा । चली उसलै शान्तनु कोला नैईं जरोआ । उन्न आखेया 'रानी इक पुत्तर ते रौन दे' । गंगा ने ओ पुत्तर ते राजे दी गोदा पाई ओड़ैया, पर बचन भंग होई जाने करी आपूं राजे गी छोड़िए चली गई । राजा ने उस

जागतै दा नां देवव्रत रक्खेया ते बड़े लाडै प्यारै कन्ने उसी पालन लगा । देवव्रत दा इक नां 'गांगेय' बी ऐ हा, की जे ओ गंगा दा पुत्तर हा । गांगेय बड़ा सूरमा हा, इन्न इतिहास प्रसिद्ध क्रोधी परशुराम जी कोला शस्त्र-विद्या सिक्खी हा ते इक बारी नेआ प्रसंग आई पेया जे इस वोरै ने अपने गुरु गो बी युद्ध च हराई ओढ़ेया हा ।

गंगा रानी ते चली गेदी ही, राजा शांतनु किश दुआस जन रौन लगे । इक दिन फिरदे फरांदे ओ शकारै दी टोह'च दूर जंगलें गो निकली गे, इक थार उनेंगी कमल फुल्ले दी बाशना औन लगी ।

बाशना लैदे २ ओ इक भौपड़ी च जाई पुज्जे, जित्थे उने सत्यवती नां दो इक बड़ी शैल मलाह-कन्या दिक्खी जेदी जिन्दू बिचा कमलें दी सुगंधी आवाकरदी ही, ते जेड़ी अपने शलपे कन्ने इन्द्रपुरी दी अपसराऐ गो बी मात करदी ही । राजा शांतनु ओदे बब्बे कोल गे ते आखन लगे 'ए कन्या तुस मिंगी ब्याही देओ' मलाह बिचा ते बड़ा खुश होआ, पर उपरा आखन लगा 'महाराज नाता ते अऊं करी ओढ़नां, पर इक बड़ी अड़चन ऐ' !

'के अड़चन ऐ' महाराज नै पुच्छेया ।

‘महाराज में चाहनां जे सत्यवती दा जेड़ा पुत्तर होऐ उऐ राजगद्दी दा हकदार होऐ पर थुआड़ा ते पुत्तर अगें गै ऐं । तुस ए हक सत्यवती दे पुत्तर गी कियों देई सकदेओ ?’ मलाह ने पुच्छेया ।

महाराजा शांतनु डूंगिये सोचें पेई गे, अपने लाडले ते टिके पुत्तर देवव्रत दा हक मारिये बेन्याई कियों करन ? मन मारिए महाराज परतोई गे । पर घर जाइए बड़े दुआस रौन लगे, कुसै कस्मे च मन नईं लगै । ओ दिनों दिन लिस्से होन लगे । देवव्रत गी पिता दी बड़ी चिंता होई, उस बड़े वरी महाराज गी पुच्छेया जे उंदी दुआसोदा के कारण ऐ ? पर महाराज नेईं बुहासरे । देवव्रत वी बड़ा समझदार ते दूरें तकर पुज्जने आल हा । उस कुसै तरीके कस्से असली गल्ला दा पता लाई लेआ ते उस मलाह कोल जाई पुज्जा । मलाह ने राजकुमारें दे ओने दा कारण पुच्छेया उस आखेया—‘में अपनी मरजी कन्ते माता सत्यवती दी लुआदी वास्तं राजगद्दी दा त्याग करनां ते हुन तस खुशी-खुशी अपनी कन्या मेरे पिता जी गी ब्याई देओ ।

मलाह बड़ा प्रसिन्न होआ ते देवव्रत दी प्रशंसा करन लगा पर चानचक्क गे उसी ख्याल आया जे इस ते

अपना हक छोड़ेंया पर कल्लै गी इसदी सन्तान जे अपने
हक्कें दा दावा करी ओड़ें ते राज फी उस दा । उस भट
अपना सैंसा देवव्रतें सामनै रखी ओड़ेंया । देवव्रत बी सोचें
पेई गेआ । लुआदी दा के पता हुंदा ऐ, पिता दा बचन
नभा जां नईं । पर पिता दे भगत देवव्रतें ने उससै लै इक्क
दृढ़ निश्चा मनै च कीता ते आखेया,

‘मलाह, जे तुकी ऐ सैंसा ऐ जे मेरे बाद मेरे पुत्तर-
पोत्रे गद्दी आस्तै लड़डन ते लै अऊं अज्ज सारे देवी देवतें गी
गवाही साखी रखिए ऐ परतिज्ञा करनां जे अऊं उमर भर
व्याह नौं करड । तुई पता नईं जे पिता मेरे आस्तै परमेश्वरै
दा रूप न, उनें मेरे आरतें जेड़े कष्ट पाए न ते मिगी अपने
मनै दा दुख नईं दस्सियै जड़ा मेरे आस्तै कर्तब्व ते धर्म पालेया
ओदे आस्तै ऐ राज ते ऐ जिंद के चीज ऐ में सुरगै दा राज ते
सैकड़ें जन्में दा सुख उंदे आस्तै वारी सकनां ।’

देवव्रत दी ऐ कठन प्रतिज्ञा सुनियै सारे धन्न धन्न करन
लगे, देवतें फुल्ल बराए ते इस कठन ते भीषण प्रतिज्ञा करी
अदुआं कोला देवव्रतें दा नां ‘भीष्म’ पेई गेआ । भीष्म जी
सत्यवती गी लेइयै पिता कोल आए । शांतनु होरें जिस बेलें ऐ
गल्ल सुनी ते बड़े प्रसिन्न होइएँ भीषम गी सीस दित्ती ।

“भीष्म पुत्तर ! तूँ एड़ी कठन प्रतिज्ञा करियै इक अनहोनी

जनेई गल्ल कीती ऐ । सारी उमर ब्रह्मचारी रौने दा बरन धारना दुनियां दा सबने कोला बड़ा कठन कम्म ऐ, इस करिये अऊं तुई ऐ अशीरवाद दिनां जे मृत्यु जनेआ कठोर देवता बी तेरी मरजी बगैर तुगी हत्थ नई पाग ।" महाभारत दे जुद्ध च जिसलै अर्जुन भीषम-पितामा गी बाणों दी सेजा उपपर सुआलेया हा तां भीषम जी दी मर्जी मताबक काल देवता होरें सूरज उत्तरण होन तकर छे: महीन इन्तजारी कीती ही ।

महाराजा शांतनु ने भीषम जी गी ऐ वर देइऐ सत्यवती कन्ने ब्याह करी लेआ ते उंदे विचित्रवीर्य ते चित्रांगद दो पुत्तर होर होए । त्रीणे आंए च बड़ा प्रेम ते समोध हा ।

समां पाइयै ओ दवें जागत स्याने होए ते भीषम जी ने उंदा ब्याह करने दा बचार कीता । काशी दे राजा दियां त्रै धियां हियां—अंबा, अंबिका ते अंबालिका । ओ वर प्राप्त होई दियां हियां इस करी काशीराज ने उंदा स्वयंवर रचाया । उस बेले दी प्रथा मताबक स्वयंवर बिचा राजकुमारिए दा हरण करी लेणा बड़ी बीरता मन्ती जंदो ही । भीषम जी दे आ ते कमजोर हे पर उंदे पाए दा सूरमा ते संसारै च कोई नई हा इस करी ओ स्वयंवरै च आपूँ गे, ते काशीराजे दिऐ त्रीणे कुड़िऐ दा हरण करिए लेई आए । आनियै अंबिका चित्रांगद गी ते अंबालिका विचित्रवीर्य

गो ब्याई दित्ती ते अंबा गो आखेया जे ओ अपनी मरजी
 कन्ने कुसै राजकुमारै कन्ने ब्याह करी लै । अंबा ने
 मनै बिच राजा शल्य कन्ने ब्याह करने दी ध्याई दी ही, पर
 हुन ते राजा शल्य कदे बी उसो ब्याहने गो तैयार नईं हा होई
 सकदा, इस करी ओ आखन लगी 'हे भीषम हुन ते में तुं दे
 कन्ने गं ब्याह करी सकनी आं, जेड़े मिगी स्वयंवर भूमि बिचा
 नसाइयै लई आए ओ, में होर कुसे कन्ने शादी नईं करी
 सकदी ।" भीषम जी बोल 'राजकुमारी । में ते आजन्म
 ब्रह्मचारी रौने दी प्रतिज्ञा करी चुके दां, में ब्याह नईं करी
 सकदा । अंबा ने उनेंगो बड़ा समझाया, रोई धोई, पर भीषम
 टस दा मस नईं होए । हारियै अंबा उदे गुरु परशुराम जी कोल
 फरयाद करन गई । परशुराम जी ने बी भीषम गो बड़ा
 समझाया, गुरु होने दे नातै रोएं होई जाने दा दाबा दित्ता
 पर इनें तिलें च तेल कुत्थुग्रां । अखीरिएँ इसै गल्ला उप्पर
 गुरु-शिष्यै दा जुद्ध होई गया । परशुराम जी ने लाई टिल्ल
 ओड़ी, पर ओ अपने शिष्यै गो नईं भकाई सके । हड़ता दी
 ते सिद्धांता दो जित्त होई । अंबा नराश होइएँ चिख चिनिएँ
 जली मोई ते अगले जन्मै च राजा द्रुपद दे घर उन्न शिखड़ी
 नां कन्ने जन्म लेइएँ महाभारतै दे जुद्धे च अर्जुन गो मदद
 देइएँ भीषम पितामा गो हराया ते अपने पिछले जन्मै दा
 बदला मकाया ।

इस चाली भीषम जी ने अपने दौनें आएँ गी व्याया बरेया ते शान्तु हुंदे सुरगवास होई जाने उपपर आएँ गी राजगद्दी दा हकदार बनाइऐ आपूँ उंदी सेवा सहायता करन लगे । पर भावी बड़ी बलवान हुंदी ऐ । विचित्रवीर्य गी ताप चढ़ेया ते नुहाड़ा सुरगवास होई गया ते चित्रांगद शकार खडन गेदा गंधर्वे कन्ने लड़ोई मोआ । महाराज शान्तनु दा राज सिंहासन खाली रेई गया । सत्यवती नै भीषम गी जोर लाया जे ओ ओदी आग्या मन्निऐ व्याह करन ते राज काज संभालन, पर भीषम जी दी प्रतिज्ञा कोई हारी सारी दी प्रतिज्ञा थोड़ी ही, उन्न इक नीं सुनी । माता सत्यवती गी बस निर्मूल होई जाने दी चिंता खान लगी, हारिए उन्न अपने पिछले जन्म दे पुत्तर श्री वेद व्यास होरें गी चेतै कीता जेड़े परम ज्ञानी ध्यानी ते महान पंडत हे । उनें सत्यवती गी आखेदा हा 'जदूँ वी तुई कोई संकट आवै तूँ याद करेआं में आई जांड' । वेदव्यास जी आए सत्यवती नै सारी गल्ल सजाई जे बंस निर्मूल होई जाने करी राज उपपर बड़ा संगट आई गे दा ऐ । वेद-व्यास जी गी सारियां विद्या ते जोग औंदे हे । उनें आखेया जे दवै विधवा रानियां उंदे सामने औन ते ओ जोगबलै कन्ने उंदी गोद हरी भरी करी ओड़डन ।

पैहलें अंबिका उंदे सामने आई पर उसी नेई शर्म आई जे उन्न अखलीं गे मोटी ओड़ियां इस करी उन्न अन्ने पुत्तर गे जन्म दित्ता जेदा नां धृतराष्ट्र हा ते जेड़ा कौरवें दा पिता होआ ।

अंबालिका जिसलै उंदे सामने आई ओ उंदे तेज कशा डरिए पीली पेई गई इस करी उन्न पीले रंग दे पांडु गी जन्म दित्ता जिदे नां उप्पर ओदे पुत्तर पांडव होए । माता सत्यवती नै इक वारी समझाई पढ़ाइए फी अंबालिका गी ब्यास जी दे सामने जाने गी आख्या पर ऐतकी उन्न अपने थां अपनी दासी गो भेजी ओड़ेया ते उस महात्मा विदुर जो गी जन्म दित्ता ।

धृतराष्ट्र अन्ने होने करी राज करने दे जोग नइ हे इस करी पांडु गी राजगद्दी उप्पर बहालिए भीषम राजकाज चलान लगे । धृतराष्ट्र दी रानी दा नां गांधारी हा जेदे दुर्योधन दुःशासन वगैरा सौ पुत्तर होए ते पांडु दी कुन्ती ते माद्री दो रानियां हियां जिन्दे च युधिष्ठिर, भीम, अर्जुन कुन्ती दे पुत्तर होए, ते नकुल सहदेव माद्री दे । एपंजै आ पांडव प्रसिद्ध होए ।

महाभारत दा जेड़ा बड़ा भारा जुद्ध होआ हा ओ इनं गे कौरवें पांडवें बिच होआ ऐ, जिदा महाभारत ग्रंथ च बड़े विस्तारै कन्ने वर्णन कीता दा ऐ । इस जुद्ध च भगवान

कृष्ण दी सहायता कर्न पांडव ते जित्ती गं, ते कौरव अपने सबने साथिए समेत मारे गे, छड़े उदे दो त्रै साथी गै बचे जिन्दे चा द्रोणाचार्य दे पुत्तर अश्वत्थामा नै इस हारै दा बदला मकाने लेई पांडवें दे पुत्तरें गी सुत्तेदे गै बड़ो ओड़ेया । अभिमन्यु अग्गे गे लड़ाई च मारे गे दा हा, हां ओदी लाड़ी उत्तरा गर्भवती ही ते आशा ही जे ओदा पुत्तर होग ते पांडवे दा बैस चलग, पर अश्वत्थामा नै ते पूरा बदला लैने दी ध्याई दी ही । उन ब्रह्म-अस्तर चलाईए बच्चे गो माऊ दे दिड्डे च गै नष्ट करी ओड़ने लेई ब्रह्म-अस्तर चलाया जेदा वार कदें खाली नई जदा हा पर कृष्ण जी नै अपनी मेहमा काने उस बच्चे गी बचाई लैता । उसै बच्चे दा नां बाद च परीक्षित होआ । इसै राजे गी कलीजुगै दे प्रभाव करिए इक ऋषि कौला सराप थोआ जे उसी सत्ते दिने परैत तक्षक नाग डस्सो लैंग ते ओ मरी जाग । राज ने उन्हें सत्ते दिने च जेड़ा सत-संग कीता ते धार्मिक कथा सुनियां ओ श्री मदभागवत बिच लिखियां दियां न ते ओदे चा अम तुसें गी किश कहानियां सनानेआं ।

राजा परीक्षित गी जिसलै पता लगा जे उन सत्ते दिने परैत मरो जाना ऐ उन अपना राज पाट अपने टिकके पुत्तर जनमेजय गी देईए आपू गंगा दे कंडे आसन लाया ते ऋषि मुनि किठे होईए धर्म चर्चा ते कथा वार्ता करन लेई पे ।

राजा परीक्षित बड़े धर्मात्मा महापुरुष हे ते उंदे नजीबें
 गो उस जुगै दे परम ज्ञानी महात्मा श्री शुकदेव होर फिरदे
 फरांदे उत्थे आई पुज्ज, उन्हें गो दिखिए सारी सभा प्रसिन्न
 होई गई । राजे ने बड़ा आदर कीता ते सिंहासनं उपपर
 बहालिए उंदी पूजा कीती ते आखेया, “महाराज मेरी उमर
 कुल सत्त दिन रेई गई दी ऐ इस करो तुस सिंगी नेआ
 आत्म ज्ञान देओ जे अऊं इन्हें थाड़े जनेह दिने च गै प्रभु दो
 महमा समझी लें ।” श्रीशुकदेव होरें आखेया “अऊं तुगी भागवत
 पुराण विचा धर्म कथा सनानां ओदे च कृष्ण जो दा जीवन
 चरित ते बड़ा प्रसिद्ध ऐ बाकी कथां बी बडियां शैल न । अऊं
 नारद जी दी कथा कोला शुरु करनां, सुन ।



नारद जी

नारद जी भगवान दे भगतेँ च इक प्रमुख भगत न । ओ
पिछले जन्म च इक दासी दे पुतार हे जेड़ी लोकें दा कम्म काज
करिऐ अपना ते पुतरा दा टिढ़ भरदी ही । इक बारी चमासे
च किश महात्मा लोग उंदे नगरें च आए, ते ओ दासी उंदी
सेवा टहल करने गी लग्गी पेई । पंजे बरें दा जागत नारद
बी दिन रात उंदे सत्संग ते ज्ञान-चर्चा विच रौन लगा
महात्माएँ दा नवद खाई २ ते सत्संग सुनी २ नारद दा
आत्म ज्ञान जागेआ ते ओ प्रभु दी भगती च मगन रौन
लगा । महात्मा लोकें उसी अशीरवाद दित्ता ते बालड़ी ब्रैसा
च गेँ ओ चंगे पासे पेई गेआ । महात्मा लोक चली
गे । इक दिन सप्पै दे डंगे कन्ने ओदी मां बी मरी गई ।
ए ससारी बधन त्रुटदे गेँ नारद जी गी बराग होई गया,
ओ जंगलै च चली गे ते दिन रात भगती करन लगे । बड़ी

कठन तपस्या कीती ते उनें गी अबरा दा इक बाणो सुनोची
 जे इक्के जन्मै च अऊं नैई मिली सकदा तू इयां गै तपस्या
 करदा चल ते अगले जन्मै च तू मिगी अवशमेव गै प्रापत
 करी लंगा । अजे तू अपनी लगन पक्की कर । नारद होर
 तपस्या करदे रे ते जिसले उनें ए शरीर छोड़ेगा अगले
 जन्मै च ब्रह्मा दे घर पुत्तार रूप च प्रगट होए । नारद जी बड़े
 बड्डे भगत न ते देव ऋषि प्रसिद्ध न । अपनी भगती दे
 बलै कन्ने ओ त्रौनें लोकें बिच फिरदे रौन्दे न ते उन्हें गी
 अमरता दा वरदान बी थोए दा ए ।




अश्वत्थामा

अश्वत्थामा गुरु द्रोणाचार्य दा जी पुत्तार ते बड़ा वीर जोद्धा
हा जिसले पांडवें महाभारत दा जुद्ध जित्ती लैता ते भीम नै
गदा कन्ने दुरजोधन दी जंड भन्नी ओड़ी अश्वत्थामा गी बड़ा
जंहर चढ़ेया । उन बदला लैने लेई इक चाल चली ते जिस
कैपे च द्रोपदी दा आ धृष्टद्युम्न अपनी हुट्टी दी सैना गी
लेईए सुत्ता दा हा, अश्वत्थामा नै उत्थें रातीं वेलै हमला
करने दी सोची । कृष्ण जी गी किश शक पेई गेया उनें
कोई बहाना लाईए पंजे पांडवें गी कुसं कम्मै गीते कुतै
होर भेजी ओड़ेया । रातीं अश्वत्थामा चुप-चबीता छौनी
दे अंदर जाई बड़ेया उत्थें गे द्रोपदी दे पज पुत्तार सुत्ते दे
हे, पहलें ते उन उंदे सिर वड्डी लैतै, फी घमासान जुद्ध
होआ । हबडबड़ाइए सुत्ती उट्टी फौज लडोईए मरोई गई ।

अश्वत्थामा पंजें सिर लेईए खुश होआ दा दुरजोधन कोल
जाई पुज्जा पर द्रोपदी दे पुत्तारें दे सिर दिखिए उसी बिंद
वी खुशी नई होई । उधर जिसलें द्रोपदी गो पता लगा
ते ओ रोन करलान लेई पेई । अर्जुन गो बडा रोह चढ़ेया
उन प्रतिज्ञा कीती जे अश्वत्थामा गो मारिए साह लैग ते
ओ अश्वत्थामा दे मगर लगा । अश्वत्थामा ने बचा दा
कोई रस्ता नई दिखिए ब्रह्म-अस्तर छोड़ेया । अश्वत्थामा
गो ब्रह्म-अस्तर छोड़ना ते ओंदा हा पर उसी परताना
नई हा ओंदा पर अर्जुन गो दवें दा ओंदे हे, इस करी उसी
रोकने आस्ते उन्हें बी ब्रह्म-अस्तर छोड़ी दित्ता । दोए
अस्तर गासैं च प्रगट होईए त्रिलोकी गो फूकन लगें । ब्रह्म-
अस्तर ते बड़े भारी ज्ञाता कृष्ण जी नें अर्जुन गो सलाह
दित्ती जे दौने गो परताई लें । अर्जुन नें दौने गो परताईए
अश्वत्थामा गो बेकार करी ओड़ेया, फी उसी फगडिए
द्रोपदी कोल लेई आए । द्रोपदी गो गुरु पुत्तारें गो दिखिए
तरस आई गेया उन आखेया जे उसी छोड़ी दित्ता जा
पर अर्जुन ने उसी मारने दी प्रतिज्ञा कीती दी ही । कृष्ण
जी ने सलाह दित्ती जे अश्वत्थामा दे सिरें च इक मणी ऐ
जेदे कन्ने ओदी वीरता ते महत्ता ऐ ओ लुआई लौ ते ओ
विना मारे गे मोआ दा समझो । उंआं वी शास्त्रें च ब्राह्मणों
दी हत्या करने दी मनाई ऐ । इस करी ओदी मणी तुआरी

लैती गई ते उसी छोड़ी दित्त। गया । इस चाली शास्तरें दी
मर्जादा वी रेई गई ते अर्जुन दी प्रतिज्ञा वी पूरी होई गई ।
ओदे बाद अश्वत्थामा दी वीरता दी जिन्दगी खतम
होई गई ।



बराह अवतार

प्रलै दे पिच्छुआं ब्रह्मा जी परतिऐ नमीं सृष्टि बनाने दी चिंता करन लगे । उनें अपने पुत्तार स्वयंभू मनु ते ओदी रानी शतरूपा गी आज्ञा दित्ती जे ओ जाईऐ फी उसै चाली मनुखें दी सृष्टि बनान जियां पैहलें हो । मनु होरें प्रार्थना कीती जे पिता जी सृष्टि ते बनग पर जिस पृथ्वी उपपर सृष्टि बसानी ऐ ओ तें समुन्द्र च डुब्बी दी ऐ । पृथ्वी दै उद्धार दा कोई उपा करो तां गल बनदी ऐ ।

ब्रह्मा जी सोचें पेई गे जे के करचै ? पृथ्वी कियां समुन्द्र चा बाहर कड्डी जा । इऐ सोच बचार करदे उनें भगवान दी शक्ति गी चेत कीता ते चानचक गे उनें गी बड़े जोरे दी इक निछ आई । निछ कन्ने उंदे नक्कै चा डूठे जिन्ना इक सूरा दा बच्चा निकलया जोड़ा दिखदे २ गे हाथो जोड़ा होई गैया । उऐ बराह भगवान

हे जिने पृथ्वी दा उद्धार करना हा, ब्रह्मा जी गो ए
 गल्ल भलेयां समझ आई गई । ब्रह्मा जी ते उन्दे परिवारै
 बराह भगवान् दी बड़ी स्तुति कीती । बराह भगवान् होरें
 जोरेयां गर्जना कीती ते समुन्दरै च छाल देई ओड़ी । पानी
 च गोता मारिए समुद्रै दी तेई विचा पृथ्वी तुप्पी लेई ते
 अपनी थूथनी उपपर उसी चुक्क दे बाहर आई गे । पृथ्वी
 गो समुद्रै दी सतह उपपर धरिए ओ आपू उसी सहारा देइए
 हेठ खड़ोई गे ते उसै पृथ्वी उपपर मनु नै सारी सृष्टि बनाई
 ते बसाई ।



कपिल मुनि जी

ब्रह्मा जी दे पुत्तर स्वायंभुव मनु ते उंदी रानी शतरूपा
दे दौं जागत हे प्रियव्रत ते उत्तानपाद ते त्रै कुड़ियां हियां
जिंदे नां हे आकूति, प्रसूति ते देवहूति । इंदे चा देवहूति दा
व्याह कर्दम प्रजापति कन्ने होआ । कर्दम ऋषि होर बड़
तपस्वी हे ते सृष्टि दे निर्माणे आस्तै ओ बड़ी साधना करा दे
हे । उंदी इस साधना च सहयोग देने करी ते तपस्या दे दिनें
ऋषि जी दी दिनरात सेवा करने करी ओ देवहूति उप्पर बड़
प्रसन्न होए ते उनें आखेया 'देवहूति अऊं तेरी सेवा कन्ने
बड़ा प्रसन्न होआं, तू कोई बर मंग' । देवहूति नै बर
मंगेआ 'जे महाराज मेरे उप्पर खुश न तां मिकी ए बर देन
जे अऊं तुं दे आला लेखा तेजस्वी बालक दी माता बनां'

ऋषि होरें खुश होइए देवहूति गी इए वर देई ओड़ेया ।
 ऋषि कर्दम होरें तपस्या छोड़िए गृहस्थ बसाया ते उंदे घर
 कई कुड़िए ते अतैं विच कपिलदेव जी दा जन्म होआ ।
 कपिल देव जी बचपन थमां गै इन्ने ज्ञानी ते तेजवान हे जे
 उनें अपनी माता देवहूति गी बी आत्मज्ञान दित्ता ते ओ बी
 संसार सागरैं चा तरी गई । कपिल देव भगवान दा साक्षात
 अवतार मन्ने गे दे न । उनें मंगा सागरैं ऊपर बेईए बड़ा
 तप कीता ते सांख्य शास्त्र दा महान ज्ञान प्रकट कीता जेदी
 कृष्ण भगवान नै गीता च बड़ी प्रशंसा कीती दी ऐ ।

कपिल देव जी बड़े क्रोधी बी हे ते बड़े दयावान बी ।
 सगर दे पुतरें घोड़ा तुपदे २ उंदे आश्रम च
 जाईए उंदा अपमान कीता तां उंदी क्रोध दी अगी
 च ओ तत्खिन गै भस्म होई गे पर जिसले उंदे बडे
 आऊ अंशुमान नै जाईए प्रार्थना कीती ते भूट प्रसन्न होइए
 उंदे उद्धार दा उपाय बी दस्सेया जे गंगा गी पृथ्वी उपपर
 आनो तां सबनैदा निस्तार होई जाग । उंदे दस्से दे उस
 प्रयोगे कन्ने अज्जै तक भारतवासी गंगामाता दा प्रसाद प्राप्त
 करिए धन्न होआ करदे न । अज्ज बी कपिल मुनि जी दी
 यादे च गंगा सागर उपर मकर सक्रांति आले दिन बड़ा
 भारी मेला लगदा ऐ ।




दक्ष प्रजापति ते सती

दक्ष प्रजापति ब्रह्मा दे पुत्तर ते स्वायंभुव मनु दे बड्डे जमात्रे हे । सती इन्दी गै इक धी ही जेड़ी शिवें व्याई दी ही । पर सौहरे जमात्रे च चिरै दी इक कैड़ चली आवा करदी ही जेदे करी हुन उंदी बनतर नेही रही दी । गल्ल इयां होई जे इक बारी ब्रह्मा जी दी सभा लगगी दी ही ते दक्ष प्रजापति उत्थें आई पुज्जे । सब्बने उट्टिए उंदा सुआगत ते मान सत्कार कीता पर शिव चुप करिए बंठे रे । दक्ष गी बड़ा रोह चढ़ेया, उन्हें शिवें गी बुरा भला बी आखेया, शिव ते चुप रे पर उंदे गरों दक्ष गी भलेआं फण्डेया । इस करिए दौने दे मन चढ़े दे हे ते कूना पेई गेदा हा ।

इक वारी दक्ष प्रजापति नै यज्ञ कीता । उन्ने अपने सारे साकें सरबंधिएँ ते देवतें गी नींदरे भेजिए सद्देआ पर पिछली कँड़ा मुजब न शिवें गी सद्देआ न अपनी धियू सती गी । सारे लोक किठे होई २ दक्ष दे जगैं गी टुरी पे । चैल पैल ते चर्चा सुनिए सती नै शिवें गी पुच्छ्या जे उने कहुँ जगैं च चलना ऐ ? शिवें आसेया जे पिशला बैर चेतै रखिए दक्ष नै नींदरा नेई भेजेआ ते बगैर सद्दे ते कुसै दे बी नेई जाना चाईदा । सती बी ए गल्ल समझदी ही पर प्योके दा मोह एड्डा प्रबल होआ जे ओ जिद करिए टुरी गै गेई । उत्थे पुज्जी ते उनें दिखेया जे जगैं च सारें देवतें दा जगभाग ऐ पर शिवें दा भाग उसी कुतै नई लब्बा । ए दिखिए ते अमना अपमान समझिए बड़ी दुखी होई । पति दी आज्ञा दा उलंघन करने दा प्राचित करने लेई ते पिता गी शिवें दे अपमान दी सजा देने लेई ओ उत्थे जगभूमि विच गै अग्नि कन्ने भस्म होई गेई । शिवें दे जेड़े गरा सती कन्ने आए दे हे उनें बड़ा हाहाकार मचाया जे शिवें गी सारी खबर कीती । शिवजी महाराज गी बड़ा क्रोध आया । उनें अपने मुख्य गरा वीरभद्र गी भेजेआ जिस दक्ष दा सिर बड़ी ओड़ेया ते सारा जग तैस नैस करी ओड़ेया । तुआई ब्रह्मा जीनै सारें देवतें गी लेईए शिवें कोला खिमा मंगी ते बड़ी बेनती करिए भोले नाथ गी प्रसिन्न कीता ते जग

संपूर्ण करने दो आग्या मंगी ।

शिव प्रसिन्न होई गे ते ब्रह्मा जी ने दक्ष गी मन्तरे कन्ते
फी जींदा करी ओड़ेया । जग संपूर्ण होआ । तुआंई
सती दुए जन्मै च हिमाचल दे घर पार्वती दे रूपै च प्रगट
होई ते तपस्या करिए पतिरूप च शिवे गी परतिऐ प्राप्त
कीता ।



ध्रुव भगत

ध्रुव राजा उत्तनपाद दी बड्डी रानी सुनीति दे पुत्तर हे ।
राजा उत्तानपाद दियां दो रानियां हियां ते ओ लौकी रानी
सुरुचि गी बड़ा चांदे हे । सुरुचि बड़ी तेज ते इषालु सुभा
दी ही । ओ न गै सुनीति गी दिखी सखांदी ही ते न उदे
पुत्तर ध्रुव गी । ओदा वी इक पुत्र हा जेदा नां उत्तम हा
ते ओ उसैगी राजै दा बारस मनदी ही ।

ध्रुव अजे पंजे बरें दा हा जे इक दिन ओ खेड़दा खेड़दा
रानी सुरुचि दे मैहलै च चली गेआ । राजा ते रानी
सिंहासन उप्पर बैठे दे हे ते उत्तम उंदी गोदा खेड़ा दा हा ।
ध्रुव बो अपने पिता दी गोदी गी हांबेया ते अपनी निक्की

निक्की बांहें कन्ने राजे गी गल जप्फी पाई लेई । रानी गी ए दिखिए बड़ा रोह चढ़ेया ! उन्न ध्रुव गी जोरेयां ब्रंड मारिए आखेया जे ओ राजा दी गोदी च बौने दा हकदार नैई की जे उन्न खुट्टे कर्म आली सुनोति दे गर्भे चा जन्म लेदा ऐ । जे ओ सुरुचि दे टिड्डू दा जन्म लैदा तां ओ राजे दी गोदा बेई सकदा हा ।

ध्रुवबच्चा गै हा पर था बड़ा समझदार ते मानी उसी ए गल्ल लग्गी गई । ओ बड़ा दुआस होआ दा अपनी माऊ कोल गया ते सारी गल्ल सनाईए पुच्छन लगा 'मां अऊं राजा दी गोदा दा हकदार कियां, होई सकनां ?' मां बड़ी समझदार ही, आखन लगी, 'पुत्तर ! तू तपस्या करें ते राजा गै नई', राजाधिराज परम प्रभु दी गोदी दा हकदार बी बनो सकनां ऐ, पर अजें तू निक्कां ऐ,

ध्रुव अपनी धुनै दा पक्का हा, उन्न आखेया मां अऊं, जिन्ना चिर प्रभु गी प्राप्त नैई करी लैन्दा मिकी चैन नैई लगना । ते ओ उसै लै तपस्या करने आस्तै जंगलें च जाने भी तैयार होई गया । ओदी माता नै बथेरा समझाया पर ओ अपने नां गो सार्थक करने आला ध्रुव हा, नैई रुक्या, चली गया ।

रस्ते च उसी नारद मुनि मिले । उने पैलें ते ओदी

बालड़ी ब्रेस दिखिए उसी समझाया जे ओ परतिऐ घर दुरी जा पर जिसले उनें दिखया जे ओ अपने इरादे दा पक्का ऐ तां भगवत भजन दो विधि ते मंत्र देईऐ उसी अशीरवाद दिता जे ओदी कीर्ति जुग जुगांतरें तोड़ी अटल रौग ।

ध्रुव मंत्र लेईऐ घोर जंगलें च चली गेआ ते बड़ी कठन तपस्या कीती । भगवान प्रसिन्न होईऐ प्रगट होऐ ते ओदी अभिलाषा मुतावक उसी गोदा पाईऐ प्यार कीता । ध्रुव बड़ा प्रसिन्न होई गेया ओदे मने दी मराद पूरी होई । भगवान नै ओदे सिरै उप्पर हत्थ फेरिऐ वरदान दिता 'जा पुत्तर तेरी कीर्ति हमेशा अमर रौग ते सारे ग्रह नखत्तर तेरी प्रदक्खना करा करडन । तूं ध्रुव नां कन्ने गे सारे संसारें द्वारा पूजेया जागा, ते हुन तूं धर जा उत्थें वो तेरा सुआगत होग ।'

ध्रुव घर वापस आए । बड़े बाजे गाजें कन्ने उंदा सुआगत होआ, ते ओदिएं दौने माताएं ते पिता नै उसी प्यार कीता । पिच्छुआं जिसलें राजा उत्तान पाद बुड्डे होऐ, राजपाट ध्रुव गी देईऐ अण्णू ओ तपस्या करने आस्तें जंगलें च चली गे, ते ध्रुव नै बड़ी जोग्यता कन्ने कई बरे राज कीता ।

ऋषभ देव ते जड़भरत

ऋषभ देव राजा प्रियव्रत दे पोत्रे ते नाभि दे पुत्तर हे ।
ओ बड़े ज्ञानी ध्यानी ते धर्मात्मा राजा होए न पर अपनी
स्यानी उमरै च उन्हें गी नेआ बराग होआ जे उनें राजपाट
ते टब्दरै दी ममता कन्ने गे नईं अपनी भुख त्रेह ते शरीरै दी
दुईऐं जरूरतें दा मोह वी त्यागी ओड़ेंया । ओ वीतराग
होई गे ते उनें गी अपनी सुध-बुध वी भुल्ली गई । इक वरी
ओ जंगलै च बैठे दे हे जे आपूं बिचें दी रगड़ै कन्ने बंजे गी
अगग लगी गई । उनें गी शरीरै दी इन्नी वी पर्वाह नईं ही
जे अगगी कोला दूर जाईऐ अपना आप बचाई लेंदे । ओ
उत्थें गे जलिए भस्म होई गे । जैनी लोक इन्हें गी अपना
तीर्थकर मनदे ते देवता आंगर इन्दी पूजा करदे न ।

ऋषभ देव हुन्दे बड्डे पुत्तारै दा नां भरत हा ओबी अपनी
 स्यानी उमरी च पिता, आला लेखा घर घिरस्ती दी ममता
 छोड़िए जंगलै च तपस्या करन चली गे । इक
 दिन ओ इक नदी दे कंडै संध्या करै दे हे । उनें दिखेया जे
 शेर दी गर्जना सुनिऐ इक हरिणी बच्चा देईए मरो गई ऐ तै
 बच्चा बचारा मा-मेटर रेई गया ऐ । उनें गी ओदे ऊपर
 बड़ी देया आई । उसी चुक्किए आश्रमै बिच लेई आए तै
 पुत्तारै आला लेखा ओदी पालमां करन लगे । ओदी टंडुआली
 च उदा अपना भजन पाठ छुड़कन लेई पेया । फी बी उन
 कोई पर्वह नैई कीती ते दिन रात ओदी सेवा करदे रे ।

ओ हरणी दा बच्चा मठोन लगा ते खेडन लगी पेया ।
 इक दिन ओ खेड़दा २ जंगलै आसै निकली गया ते उत्थें
 होर हरणें गी कदाडियां मारदे दिखिए ओबी उंदे च रली-
 मिली गया । साथै गी साथ प्यारा, उसी अपना साथ लब्बों
 ते ओ फी परतोआ नैई । भरत होर उसी बलगी बलगी
 ते तुप्पी तुप्पी ब्याकल होई गे । अन्त बेलै जहूँ उंदा
 सुरगबास होआ तां बी उंदा ध्यान उस हरणी दे बच्चे बिच
 गे रेआ । इस करी अगले जन्मै च ओ हरणें दी जूनि च
 आए पर अपने पिछले जन्मै दे ज्ञानै ध्यानै करी उनें गी
 परानियां सबबै गल्ला चेतै रहियां । उनें सोचेया जे हिरणें

दी समता कारण मिकी इस जूनै च औना पेया ए । इस
 करी हुन मोह ममता दा पूरा पूरा त्याग करना लोड़चदा ऐ ।
 तीरथें उप्पर फिरन लगे ते साधुए दे आश्रमें दे अगें पिच्छें
 रौन लगे । ओ देह छुड़की ते फी ओ मनुबखै दी जूनै च
 आए । ब्राह्मणें दे घर जन्म होआ । विदवान पिता नै
 जतन कीता जे पुतरै गी पढ़ाई लिखाईए विदवान बना पर
 भरत हुन कुसै बी मोह ममता च फसना नई चांदे हे । इस
 करी ओ सारे बंधने कशा सरबन्ध त्रोड़िए शदाईए आडू रौनै
 लई पे । जे किश कुसै दिता खाई लाई ओड़ेया ते जे कम्म
 आखेया करी ओड़ेया । बबै दे मरने परैत आंए उसो
 जमीनै दी बाई राई ते राखी दा कम्म सौपी ओड़ेया ओ
 कम्म करी ओड़दे ते भाबियां जे किश बेया त्रबेया दिंदियां
 बड़े नंदे कन्ने खाई ओड़दे । इक बारी रातीं ओ खतरै दी
 राखी गी खड़ोते दे हे जे किश डाकू आए ते अपनी काली
 माई गी बल चाढ़ने आस्तें भरत होरें गी चुक्किए लई गे ।
 भरत होर उर्थें बी बड़े मजे कन्ने टुरी गे । मस्या आले ध्याड़ें
 जिसलै डाकुएं उनें गी लाल टल्ले लुआईए गले च हार पाया

ते तलवारा दा फट्ट मारन लगे उसलै बी उनें उंदा कोई बरोध नैई कीता पर देवी ते इक संत महात्मा दी हत्या नैइ सहन करी सकदी ही । उन्न भट प्रगट होइए तलवार खुस्सी लैती ते डाकुएं दा संहार करी ओड़ेया । भरत होरें गी इन्दिऐं शदाईपुने दिऐं गल्लें करी लोग जड़ आखदे हे । जड़ भरत होर हुन बेमुहारे फिरन लगी पे । इक दिन राजा रहुगण पालकी च बेईऐ आत्मज्ञाने दी प्राप्ति आस्तें कुसै गुरु दी तलाशै च तुआइं शा लंगा दा हा । पालकी चुकने आलें चा इक बमार होई गया ते राजा दे आदमिएं मुट्टा ताजा दिखिए जड़भरत होरें गी बगारी फगड़ी लेया ते पालकी च लाई लेया ।

जड़भरत होर बड़े नंदै कन्ने टुरी पे पर अपनै सुभा दे सताबक जिसलै रस्ते च कोई मकोड़ा या होर कोई जीव लब्दा हा ओ उड़किऐ, छड़ापी मारी ओड़दे ते पालकी डोलके खान लेई पौंदी ही । राजे गी बड़ा रोह चढ़ेया उनें जड़भरत होरें गी ब्रंड मारी । जड़भरत होरें गी क्रोध डर यां होर कोई विकार नैई होआ ते ओ फी उससै चाली चलन लई पे ।

राजा बड़ा हरान होआ । उन्न पुच्छेया 'के गल्ल ऐ ? तुसे मेरो गल्ल सुनी नैई जां समझोई नैई ?' एदे जबाबे च जड़भरत होरें एसियां आत्म ज्ञाने दियां गल्ला लाईयां जे राजा भट उंदे पैरें पेई गया ते उनें गी अपना गुरु मन्तिऐ उत्थुआं परतोई पेया । अदुंआं थमां लेईऐ जड़भरत हुंदी मानता होन लेई पेई ते हुनै तकर लोग बड़े माने कन्ते उनें गी चेता करदे न ।



अजामिल

अजामिल साढ़े पुराणिक साहित्य च इक प्रसिद्ध पापी होआए । पैले ओ इक बड़ा श्रेष्ठ ब्राह्मण हा । वेदें, शास्त्रें दा ज्ञाता ते बड़ा धर्मी कर्मी हा । इक दिन ओ होम करने गीतें समघां लैन जंगलै गी जा करदा हा । उन्न रस्ते च इक बड़ी गे शैल नटनी दिखी । ओदे शलैपे उप्पर डुल्लिए ओ कुसंगति च पेई गया । सारे धरम करम छोड़िए शराब पीने ते मास खाने जनेह भैड़े कम्म करन लेई पेआ । उस नटनी दी कुसंगति च पेईए ओ हर ओ भैड़ा कम्म करन लेई पेया जेदी शास्त्रें च मनार्ई कीती दी ऐ ।

ओदे कई पुत्तर होए । सारें थमां निक्के दा नां उन्न

नारायण रखेदा हा ते ओ उसी प्यार बी बड़ा करदा हा ।
 खिन मात्र बी उसी अखिएं थमां ओलै नईं होन दिंदा हा ।
 इयां गै दिन बीतदे गे ते अजामिल बुड्डा होई गया । हुन
 ओदे मरने दे ध्याड़े आई गे । कदे कदे उसी अने पाप
 कर्म कोला भौ लगन लेई पौंदा पर हुन के होई सकदा हा ।

ओदा अंत समा आया । जमराज दे दूत उसी लैन
 आए । उंदियां भयंकर सूरतां दिखिए उसी बड़ा डर लगा
 ते उन करलाईए नारायण गी बाज मारी । जियां आखो
 सूरज अगुआं बदल हटी जान इयां गै अपने पुतरा गी बाज
 मारदे गे ओदे पुराने शुभ संस्कार जागी पे ते मरने वेलै उसी
 आत्म ज्ञान होई गया । पापे दी सारी कालख जेढ़ी जमदूत
 बनिए उसी डरा दी हो पता नईं कृत्ये गैव होई गई ।
 आत्म ज्ञान दी लो साक्षात विष्णु भगवान दा रूप धारण
 करिए आई खड़ोती । बैकुण्ठ धामे दा बमान आया ते
 ओदे उप्पर बैठे दे देवदूत जमराज दे दूते गी आखेया जे
 कुसंगति च पौने करी इन्न जेड़े पाप कीते हे अज सच्चे मन
 कन्ने प्रभु दा नां लैने ते प्राचित करने करी ओ सारे पाप
 कटोई गे न ते एदे पूर्व संस्कार जागी पे न । ए हुन शुद्ध
 आत्मा होई गेआ ऐ । इस करी बैकुण्ठ दा अधिकारी होई
 गया ऐ । जमदूत ए सुनिए परतोई गे देवदूत उसी
 बमाना उप्पर बहालिए बैकुण्ठ धामा पास डुआरी भरी लई ।

राजा पृथु

राजा बेन साड़े पुराणों दे इतिहास बिच बड़ा प्रसिद्ध पापी होआ ऐ । उन्न संहारनै उप्पर बौन्दे गै टंडोरा फेरी ओड़ेया जे दुनिया च कोई परमात्मा गी नईं मन्नै ते कोई जग, धर्म ते परोपकार नईं करै । शड़ी राजा बेन दी गे मानता होनी चाईदी ऐ । ओ साक्षात परमात्मा दा रूप ऐ । धर्म कर्म मिटी गेआ ते धरती उप्पर बड़ें संकट ओन लगे । काल पौन लगे बमारियां बदन फलन लेई पेईयां । लोक बड़े दुखी होए ते राजे दे अत्याचारें दी चर्चा चौनें पासें होन लगी । उस बेलै ऋषि मुनि गै समाजें दे कर्ता धर्ता हुन्दे हे । उनें सोचेआ जे राजे गी चलिऐ

समझाना चाईदा ऐ । ओ किठ्ठे होईऐ राजा बेन कोल
 गे । उसी समझान लगे जे धर्म-कर्म कन्ने गै प्रजा दी
 पालमा होई सकदी ऐ इस करि राजा गी धर्मात्मा होना
 चाइदा ऐ । ए गल्ल सुनिऐ बेन गी बड़ा रोह चढ़ेया ।
 ओ ऋषिएं गी गालियां कडुन लगी पेआ । ऋषिएं गी बी
 ए गल्ल दिखिए बड़ा रोह आया । उन्हें शरप दित्ता ते
 राजा बेन उत्थें गे मरी गेआ । ऋषि लोग ते अपने २ घरें
 गी चली गे पर राजा बेन दी माता नै बेन दी लोथ नीं
 फूकन दित्ती । ओ बड़ी विद्वान ही ते मंत्रे दे जोरें कन्ने
 उन्न उस लोथी गी सड़न नीं दित्ता । इक कमरे च सांबिए
 रखी ओड़ी ।

राजे दे नईं होने करी देसै दा सारा बन्दोबस्त बिगड़ी
 गया चोर डाकुऐं गी डर नईं रेया ते काल ते बमारियां होर
 वी बदी गेईयां । परजा त्राहि त्राहि करन लेई पेई ।
 ऋषिएं फी किठ्ठे होइऐ सोचेया जे कोई राजा होना चाइहदा
 ऐ जेड़ा राजै गी संमालै । राजा बेन दी कोई सन्तान नईं
 ही उनेंगी पता लगा जे ओदी लोथ अजें सुरक्षित पेई दी ऐ ।
 ओ उत्थें जाई पुज्जे ते ओदी जंड मलन लगे । ऋषिएं दे
 जोग बलै कन्ने लत्ता बिच्चा इक काला भूत जन बामना
 प्रगट होआ जेड़ा राजा दे सारे पापकर्म दा फल हा । ऋषिएं

उसी निषाद (मलाह) जाति दा बड्डा लंबड़दार बनाई ओड़ेया । फी बेन दे शुद्ध शरीरं गी मथन लगे । मथदे २ ओदी इक बांहवां बिच विष्णु भगवान दे अंश पृथु दा जन्म होआ ते दुई बांहवा चा लक्ष्मी दा अवतार रानी अर्चि दा जन्म होआ ।

इदे दौने दे जन्म उप्पर देवते फुल बराए ते ऋषिऐं मुनिऐं बड़ी स्तुति करिऐ राजा पृथु गी राज सिंहासन उप्पर बहालेया । राजा बेन दे पापें करी ते धर्म कर्म दे बंद होई जाने करी जेड़े काल पेदे हे ते सोके लगैदे हे ओ पृथु नेए धर्मी राजे दे गद्दी उप्पर बाँदे गे मुक्कन लेई पे । जग ते धर्म कर्म होने कर बरखा बदन लगियां ते दुनियां हरी भरी होई गेई । पैले दी बंजर ते रक्कड़ जमी बड़ी मेहनत कन्ने बाही राही होने करि ते ऊवड़ खाबड़ भूमि बरोबर होने करी मती सारी भूमि उपजाऊ होइऐ फसलां देन लगी । ए सारा पृथु राजा दी मेहनत कन्ने होआ हा । इस करी अदुआं कोला भूमि दा नां बी पृथ्वी पइ गेया ते सारी दुनियां च राजा पृथु दे प्रताप दा डंका बज्जन लगा । ते अजे तकर पृथ्वी दे नां कन्ने २ राजा पृथु दा नां बी अमर चली आवैदा ऐ ।



राजा प्रियव्रत


प्रियव्रत राजा उत्तानपाद दे भ्रा ते ध्रुव भगत दे चाचा हे । जन्मै थमां गं विरक्त ते ज्ञानी होने करो इनें घर घूस्ती बा जंजाल नईं पाया ते गन्ध मादन पर्वतै उप्पर तपस्या करन टुरी गे । इन्दे पिता स्वयंभू मनु नै इनें गी बड़ा समझाया जे ओ राज करन ते सृष्टि दे बदाने फलाने च सहयोग देन पर इनें इक नईं सुनी । नारद मुनि इन्दे कन्ने रोज ज्ञान चर्चा करदे ते उपदेश दिन्दे हे । ब्रह्मा जो गी पता लगा जे उन्दा सबनै कोला जोग्य पोत्रा संसारै थमां विरक्त होईए तप करन टुरी गया ऐ । ओ आपूँ गन्धमादन पर्वतै उप्पर आइए उसी समझान गे । ब्रह्मा जो ने प्रियव्रतै गी

बड़ी युगति कन्ने समझाया जे सृष्टि गो बदाना फलाना हर मनुक्खै दा फर्ज ऐ । ते जे चंगे २ लोक सृष्टि दो इस बेले दो लोड़ें उप्पर ध्यान नेईं देन ते सधारण लोक वी उंदे पासै दिखिए अपना रस्ता छोड़िए दूआ फड़ी लैन तां इस चाली सृष्टि बनान दा पुण्य कर्म पिच्छें रई जाग । दूए एबी गल्ल ऐ जे कर्म क्षेत्र गो छोड़िए ते जंगलें च जाई बौने कन्ने प्रियव्रत दो जोग्यता ते ओदे महान गुणें दा दुनियां गो कोई लाभ नईं होग । इस करी उसी जरूर व्याह करिए घृस्ती बसानी चाइदी ऐ । ते राज काज संभालिए परजा दे हित आस्तै कम्म करने चाइदे न । ब्रह्मा जी दे आखे लगिऐ प्रियव्रत होरें व्याह कीता ते राजकाज संभालेया । उनें दो व्याह कीते ते उन्दे तेरां पुत्तर ते इक धी होई ते उंदा टब्बर बड़ा बदेआ फलेया ।

राजा प्रियव्रत बड़े प्रतापी ते तेजस्वीहे । इक वारी उनें सोचेया जे सूरज छड़ा दिनें गै लो करदा ऐ । ए गल्ल ठीक नईं । मिगी चाईदा ऐ जे अपने तेज कन्ने रातीं बो लो करी ओड़ां । ए सोचिए उनें इक बड़ा बड़ा रथ बनाया । उस रथै गो इक्कै पहिया (पिज) हा । उस रथै उप्पर चढ़िए ओ सूरज दे रथै पिच्छे २ उसी गे तेजी कन्ने चक्कर लान लगे ते सारी पृथ्वी गो गाई मारेया जे

कोई नेआ केन्द्र स्थान लब्धै जित्थें सूरजै गो स्थिर करि
 ओड़न ते दिनें रातीं लो गै रवै । अजें उनें सत्त गै चक्कर
 लाए हे जे ब्रह्मा होर आई गे ते आखन लगे । 'पुत्तर ! ए
 दिनें रातीं दा चक्कर मनुष्य जाति दे हितै आस्तै बड़ा जरूरो
 ऐ । इस करी तू इसी इयां गै चलन दे । राज प्रियव्रत
 मन्त्री गे । आखदे न जे उंदे रथ जेड़े सत्त चक्कर लाए हे
 ओदिएं सत्त लीकरें कन्ने सत्त समुन्दर बनी गे ते उन्दे बिच २
 जेड़ी धरती रई गई ओ सत्त द्वीप बन । इयां राजा प्रियव्रत
 नै सारी पृथ्वी दा राज अपने अधीन करिए नमैं नमैं टापू ते
 द्वीप बनाए ते अपने पुत्तरें गो बंडी दित्ते आपू फी तपस्या
 करन जंगलें च चली गे ।

प्रियव्रत दे बड़ु पुत्तर आग्नधि दे अगगे नौ पुत्तर होए
 ते उन्न जम्बू द्वीप दे नौ हिस्से करिए अपने नवें पुत्तरें गो
 राज बंडी दित्ता । साड़ा ए भारत देश उनें नवें खंडे दा गे
 इक हिस्सा ऐ जिदे बिच अस लोक रवा करने आं ।



भगत प्रह्लाद

पराने जमाने च देवतें ते राक्षसें दे आप्पूं चें जुद्ध लग्गे रौन्दे हे । देवता लोक जग्ग, धर्म करने आले ते भगवान दे भगत हे पर राक्षस लोग न भगवान गी मनदे हे ते ना गें धर्म कर्म दा उनें गी कोई ख्याल हा । सगुआं उंदे राजें च जेड़ा कोई जग्ग करदा, परमात्मा दा नां लैदा उसी सारी ओडदे हे । रोज देवतें गी दुख दिंदे हे हिरन्यकश्यप ते हिरन्याक्ष राक्षस बी दो सक्के आ हे । ए देवतें दे बडे बैरौ ते भगवान दे नां दे बरोधी हे । हिरण्याक्ष गी ते भगवान नै बराह दा रूप धारण करिए सारी ओडेया हा पर हिरण्यकश्यप अजें बचेदा हा । ओ बड़ा सूरमा ते कठोर

हा । उन्न अपने आऊ दे मारने आले विष्णु भगवान कन्ने बदला चकाने लेई अपना बल तेज बदाने दी गल्ल सोचिए बड़ी कठन तपस्या कीतो । ब्रह्मा जी प्रगट होए ते उन आखेया 'वर मंग' हिरण्यकश्यप आखन लगा 'हे ब्रह्मा जी जे तुस मेरी तपस्या कन्ने खुश ओ ते मिगी अमर होने दा बरदान देओ । ब्रह्मा जी बोले 'पुत्तर ! अमरता दा बरदान सिर्फ देवतें गी थोई सकेदा ऐ । हीर कुसै गी ए बरदान नई मिली सकदा । इस करी तू होर किश मग ।'

हिरण्यकश्यप ने चलाकी कीती आखन लगा 'अच्छा महाराज ! मिकी ए वर देओ जे मीं तुं दी सृष्टि दे जीबें चा कुसे कोला नई मरां, कोई अस्तर शस्तर बी मिगी नई मारी सकै नां अऊं घरै दे अंदर मरां न घरै बाहर, न दिनें मरां न राती नां भुजां मरां न श्मानां उप्पर ।'

'तथास्तु' अखिए ब्रह्मा जी टुरी गे ते राक्षस घर आइ गया ते निश्चित होईए देवतें गी टक्करन लगा देवते सुरग छोड़िए नसदे नई लब्बे ते सृष्टि दी सारी विवस्था बिगड़न लई पेई ।

जदू हिरण्यकश्यप तप करन गेदा हा तां मौका दिखिए नारद जी ओदी रानी कोल जान औन लेई पे ते उसी भगवान

दी भगती दा उपदेश दिंदे रे । रानी दे घर जागत होने
 आला हा । उसी ओ भगती दे संस्कार पौंदे रे ते जिसलै
 उन्नै जन्म लेया उस वेलै देवता लोग खुश होई गे जे राक्षस
 कुलै च भगवान दा इक बड़ा भगत जम्मेया ऐ । जागते दा
 नां प्रह्लाद रखेया । ओ जरा बड़ा होआ तां हिरण्यकश्यप
 नै उसी पाठशाला पढ़न भेजी ओड़ेया । पर प्रह्लाद राम-राम
 दे सवा न ते अपनी पोथी उपपर किछ पढ़दा न पढ़ी उपपर
 होर किश लिखदा । बब्बै गी जिसलै इस गल्ला दा पता
 लगा उन्न पुत्तरै गी सहिए बड़े लाड्डे कन्ने समझाया जे
 इस दुनियां च राम या परमात्मा कोई चीज नैईं सारें कोला
 बड़ा दुनियां च तेरा पिता ऐ । इस करी तू उसै दी आज्ञा
 मन्निए अपनी पढ़ाई लखाई कर । ए सारे देवता तेरे पिता
 दे शत्रु होने करी तेरे बी बैरी न । पर प्रह्लाद उपपर
 ओदे समझाने बझाने दा कोई असर नैईं होआ । उसी
 रामनाम दी जेड़ी रट लगी दी ही ओ होर बी प्रबल होई
 गई । हिरण्यकश्यप नै प्रह्लाद गी बड़े डरावे दाबे दित्तै
 पर जिसलै ओ नैईं मुड़ेया तां उन्न जल्लादे गी हुकम दित्ता
 जे प्रह्लाद गी जिए मारी ओड़ो ।

प्रह्लाद दियां मुश्का कसिए जल्लाद लोग लेई गे ते उसी
 बड़ी उच्चो डडुलै उपपरा रलकाइए खल्ल मुट्टेया रप भगवान

जेदी रख्या करे उसी कुन मारी हकदा ए । प्रह्लाद गी बिन्द बी जरब नईं आई । फी उसी मस्ते दे स थिए अगें सुट्टेया पर हाथी चोंकां मारदा ओदे कोला दूर नस्सी गया । समुद्रे च सुट्टेया ते ओ उप्पर तरन लेई पेया । जहर पलयाया तां उसी पता बी नीं लग्गा जे जहर पीता ए जां शरबत ! आखर प्रह्लाद दी बुआ 'होई' आखन लगी । में इसी लईए बलदी चिखा उप्पर बेई जन्नियां । जिन्ता चिर ए जली नईं मरग में इसी नस्सन नईं देड । मिकी वरदान थोए दा ए जे में कदे अगगी कन्ने नईं जली सकदी । सवनें गी ए सलाह पसिंद आई पर भगवान दी लीला बड़ी अपरंपार ए । होई चिखा च बौन्दी गे जलिये भस्म होई गई ते प्रह्लाद गी आंच बी नईं आई । ओ राम राम आखदा बलदी चिखा'च इयां गे वैठा रेया आखो फुल्वे दी सेजा उप्पर वैठा दा होए । हुन ते हिरण्याकश्यप जली मोआ । उसी बड़ा रोह चढ़ेया ते उन्न नंगी तलवार चुक्किए प्रह्लाद गी आखेया :—

“दुष्टा ! हुन तू मरने गी तयार होई जा । दिखना केड़ा तेरा राम आईए तुकी मेरी तलवारें कशा बचांदा ए ।”

“पिता जी मेरा राम सर्वशक्तिमान ते सर्वव्यापक ए, उए मेरी रख्या करने आला ए । ए तलवार बेचारी मेरा

के बगाड़ी सकदी ऐ ।” प्रह्लाद गो प्रभु दी महिमा उप्पर पूरा विश्वास हा इस करी पूरे आत्म विश्वासै कन्ने निरभौ होईए आखी दित्ता ।

‘जेकर तेरा भगवान सर्वव्यापक ऐ तां में हुनै तुगी इस थम्मै कन्ने बन्निऐ तलवारै कन्ने लगां बडुन । आख अपने प्रभु गो, आईए तुगी बचा ।”

हिरण्यकशिपु ने हुकम दित्ता जे बालक प्रह्लाद गो तत्खिन थम्मै कन्ने बन्नी दित्ता जा । ते जिसले ओ कसिए बनोई गया ते हिरण्यकशिपु ने तलवार दे इक्के फट्टै कन्ने प्रह्लाद दी मुंडी बडुने दे इरादे कन्ने जोरेयां उल्लरिए तलवार तानी उसलै बड़े जोरै दी धनघोर बाज होई, थम्म त्रुट्टिए दो टोटै होई गया ते ओदे विचा भगवान बृसिंह दी बड़ी बडु देह प्रगट होई । उनें झटपट उस राकशै गो फगडिऐ अपने पट्टे उप्पर सुट्टी लेता ते डोआठिनी उप्पर बेईए उस त्रकाल संध्या बेलै अपने लम्मे २ नैखरुएँ कन्ने ओदा डिडु पाडिऐ आंदरां वाहर खिची ओड़ियां ते इस चाली अपने भगत प्रह्लाद दी रख्या कीतो ।

भगवान गो अपने भगतै दी रख्या करने आस्तै गे नरसिंह अवतार धारण करना पेआ । इस चाली दा रूप

मता चिर हुन्दी रई । आखर हाथी दी ताकत घटन लगी ते
 हौसला बी ढिल्ला पौन लगा । जिसलै हाथी नै अपने बचने
 दी कोई सबील नई दिक्खी तां भगवान दा सिमरण करन
 लगा । ते स्तुति करन लगा । अगने भगतै दी अर्दास सुनिए
 भगवान उसी बचाने गीतै पुआने पैरें गै द्रौड़े । गरुड़ नै भूट
 गै उनें गी मूण्डे उपपर चुक्की लैता । भगवान गी दूरा दा गै
 औन्दा दिक्खिए हाथिएं दा राजा नन्दे कनें पसोई गआ ।
 उसनै अपनी मुण्डा कनें सरा दा कमल ध्रूकेआ ते भगवान
 गी भेटा चाढ़ेआ । भगवान हुन्दे कशा भगतै दा दुःख नई
 जरोआ । रस्ते चा गै गरडा दी पिट्टी दा उतरी होए ते
 द्रौड़िए हाथी गी खिन्चिए सरा दा बाहर लई आये । मगर-
 मच्छा नै फी बी पैर नई छोड़ेआ । तां भगवान जी नै सुदर्शन
 चक्कर चलाइए नुआड़ी मुण्डी बड्डी ओड़ी । देवते फुल्लें दी
 बरखा करन लगे ते खुशी होइए बाजे बजान लगे ।

दरअसल इस हाथी ते मगरमच्छे दौनें गी पिछले जन्मा
 दा आप लगा दा हा ते ओ जून भुगतन आए दे हे । मगर-
 मच्छ पिशले जन्मै च हू हू नां दा गंधर्व हा । देवल ऋषि
 हुन्दे सरापे कनें उसी ए जून थोई ही चक्करै कनें मुण्डी
 बढोन्दे ओ सुगै गी उठी गेआ । हाथी पैलै जन्मै बिच पाण्डय
 देसा दा राजा हा । ओदा नां इन्द्र धुम्न हा । राजा बड़ा

ज्ञानी ते भगवान दा भगत हा । ओ कुलाचल पहाड़ें उप्पर
 कुटिया पाइए रौन्दा हा ते ईश्वर भजन करदा हा । इक
 दिन राजा सौन बर्त धारिए ते समाधी लाइए बैठा दा हा
 इन्ने बिच अगस्त्य ऋषि उत्थें आये । समाधी लाने करी
 राजे गी पता गै नईं लगा । राजे गी चुप्प बैठे दा दिक्खिए
 ऋषि गी अपना किश अपमान बभोआ । ओ श्राप देइए
 टुरी गे जे तू बड़ा घमंडी राजा एं, जा तू हाथी होई जागा ।
 भगवान दी भगतो करी हाथी दी जूना बिच बी ज्ञान बनेया
 रेआ । इस्सै करी ओ स्तुति करी सकेआ । नईं ते इक हाथी
 गी ईआं ज्ञान कुत्थुं होना हा ।



राजा बलि ते वामन

राजा बलि भगत प्रह्लाद दे पोत्रे हे । गुरु शुक्राचार्य
नै उन्दे कशा इक जग कराय। जगै दे प्रभाव कन्ने राजा
बलि दी शक्ति ते बल होर बदेआ। राजा बलि नै देवतें दे
राजा इन्द्र उप्पर चढ़ाई कीती। उसी हराया ते सुर्ग दा
राज खोई लेता। सारे देवता बिष्णु भगवान दी शरनै गे।
भगवान आखन लगे दिक्खो समें समें दी गल्ल हुन्दी ऐ।
जोके असुर बादे बिच न। इससै करी तुस हारे ओ। इक
कम्म करो जद्दं तोड़ी तुन्दे दिन नईं फिरदे तां तोड़ी तुस
उन्दे कन्नो मेल करी लौ। ए बी राजनीति दी चाल हुन्दी
ऐ। इस लै जो किश ओ आखन तुस मन्त्री जाओ। तुस
जाओ तें असुरें गी आखो आओ समुद्र छीलचै। समुद्र

बिचा अमृत निकलग । अमृत पी लौ तां मृत्यु नईं हुन्दी ।
 ओ अमृत तुसेंगी थोग । अऊं नेईं सार लड़ाड जे असुरे'गी
 इक त्रोपा बी नईं थोग । तुस अमर होई जागेओ ते असुरे'गी
 हराई ओड़गेओ । जिसलै शुक्राचार्य उन्दे कन्ते रोएं होई
 जाडन उसलै तुस सुर्ग बी खोई लैओ ।

भगवान जी दी सिख्या मताबक सारे देवता राजा बलि
 दी सभा बिच गे कुसै कोल कोई शस्त्र नईं हा इस करी
 असुरे' समझी लैता, जे ए लड़न नईं आये । इन्द्र नै राजा
 बलि गो आखेआ—दिखो अस तुस आपू बिच आ-आ आं ।
 इस करी लड़ना ठीक नईं । आओ अस तुस रलिए समुद्र
 छोलचै । ओदे बिचा अमृत निकलग । उसी पीए अस
 दोए धड़े अमर होई जागे । सारे असुर इन्द्रे दीए गल्ले
 बिच आई गे । उनें गी सलाह बड़ी पसिन्द आई । उनें
 मधानी बनाने गीतै मन्दराचल पहाड़ चुक्केआ ते उसी क्षीर
 सागरें दे कण्डे लई चले । पहाड़ बड़ा भारा हा, चुकोए
 नईं । रस्ते बिच छुड़की गेआ ते कई असुर हेठ आइए
 मघोई गे । भगवान प्रगट होए ते उनें पहाड़ गरुड़ दी पिढी
 उप्पर रखी लैता । ते भट गै समुद्र कण्डे पजाई ओड़ेआ ।
 मधानी गी लितारनी पाने आस्तै बासकी नागै गी मनाया ।
 उसी आखेआ—तुगी बी अमृत पल्यागे । देवतें ते राक्षसैं

मन्दराचल दी मधानी बनाई ते बासकी नागै दी डोरी । इक पासेआ देवतें पगड़आ ते दूए पासे दा राक्षस छोलन लगे । पर हेठ किश रखेदा नई हा इस करी मन्दराचल हेठ नै हेठ दड़न लगा । भगवान बिष्णु नै कछोपड़ दा रूप बनाया ते मंदराचल गी अपनी पिढी उपपर लई लेआ ते ईआं उसी हेठ जाने कशा रोकेआ ? तामी कम्म तोड़ नई चढ़े । उपपर किश दबा नई होने करी पहाड़ झुल्लन लगा । भगवान नै बड़डा देह धारिए उपपरा दा दबाया । हुण समुद्र मथोन लगा ? फी बी किश नतीजा नई निकलेआ ? भगवान नै दिक्खेआ जे देवते ते राक्षसें दौने बिच बल नई रेआ जे भलेआं छोली लैन । उन्हें सारें गी परे हटाया । आपूं गे दौने पासेआ बासकी गी पकड़ेआ ते छोलन लगे । सारें कशा पैलें समुद्रा विच्चा हलाहल जहर निकलेआ । बड़ा डाडा जहर हा । त्रैवै लोक नाढ़े कन्ने सड़न लगे । भगवान नै देवतें गी सलाह दिती ते उन्ने शिवे गी बेनती जे तुस पी लौ ते असेंगी बचाओ । शिव जी परोपकारी न । ओ जहर उनें अपने गले बिच रक्खी लैता । उसकरी उन्दा गला नीला होई गेआ ते उनें गी नीलकण्ठ आखदे न । फी समुद्र गी छोलेआ ते कामधेनु गौ निकली ओ देवतें लई लंती ।

उच्चैश्रवः घोड़ा निकलेआ । ओदे पिछुआं चौं दन्दें आला चिट्टा
 ऐरावत हाथी निकलेआ । ऐरावत कन्ने सत्ता होर हाथी ते
 हाथनियां निकलियां । उच्चैश्रवः घोड़ा ते ऐरावत हाथी पिछुआं
 इन्द्र गी थोए । फी कौस्तुभ मणि निकली । ओ विष्णु
 भगवान नै लई लई । ओदे पिछुआं कल्प वृक्ष निकलेआ ।
 कल्प वृक्ष सुगँ बिच रक्खी ओड़ेआ । नाढ़े कशा जे किश
 मगो थोई जन्दा ऐ । एदे पिछुआं अप्सरां निकलियां ।

एह बी सुगँ बिच रौन्दियां न । इन्ने रतन निकलने
 परैन्त लक्ष्मी देवी निकली । उन्न बिष्णु भगवान कन्ने व्याह
 करी लैता । फी समुद्र छोलेआ ते धन्वन्तरी हत्थे बिच अमृत
 दा घड़ा लइऐ निकलेआ उसी दिखदे गं सारे राक्षस दौड़ ।
 उनें ओ घड़ा खुस्सी लैता । हुण आपू बिचें गं लड़न लगे ।
 सारें गं पैले अमृत पीने दे लोभी हे ।

भगवान नै दिक्खेआ जे कम्म खराब होन लगा ऐ । देवते
 रई जाडन ते राक्षस अमृत पीऐ अमर होई जाडन । सोचन
 लगे के उपा करचें जे असुरें गी अमृत नई थोए । भगवान
 नै इक बड़ी शैल स्त्री दा रूप धारण कीता ते उत्थे आई गे ।
 सारे असुर उस मोहिनी गी दिक्खदे गं नुआढ़े उप्पर मोहित
 होई गे । ओ नुआढ़े कश आइऐ आखन लगे अस देवते ते

असुर आ आ आं । असैं अमृत आस्तैं सागर छोलेश्रा ऐ । हुण नाढ़े उपपर भगड़ा होन लगा ऐ । तूं सारें गी अमृत वण्डी दे । भनवान गी ईऐ ते लोड़ ही । उनें आखेंआ—अमृत ते अऊं वण्डी देड पर माढ़ी शर्त ए ऐ जे में जे किश करां ओ तुसैं गी मन्नना पौग । असुरें आखेंआ खरा । भगवान नैं सारे देवते ते असुरें गी बक्ख २ पंगतिएं बिच बहालेश्रा । देवते आसैं पिठु कीतो ते असुरें सामने मुंह करिए खड़ोई गे । पिछड़े पैरें हटदे २ देवतें गी अमृत पल्यान लगे । राहू नां दा असुर भेस बदलिए देवतें बिच बेई गेश्रा । जिसलैं उसी अमृत पलाया ते सूरज ते चन्द्रमा नैं सैनी करिए दस्सेआ जे ए असुर ऐ । भगवान नैं सुदर्शन चक्कर कन्ने नुआड़ा सिर बड्डी ओड़ेश्रा । पर अमृत संघे हेठ गेदा उठी हा इस करी ओ मोआ नई । सिर राहू ते धड़ केतु नां दे दौं ग्रह बनें । हुण बी ओ बेंर चेतें आँन्दा ऐ ते ग्रहणें आले रोज राहू सूरज ते चन्द्रमा गी निगलने गी द्रौड़दा ऐ ।

देवतें गी सारा अमृत पल्याइऐ मोहिनी रूप भगवान आपूँ छप्पी गए । असुरें कन्ने भली चारसौबी होई । ओ भलखोइऐ ते रोएँ होइऐ देवतें कन्ने लड़न लगे । ऐ देवासुर संग्राम नां दा बड़ा भारी जुद्ध होआ ऐ । अमृत पीने करी इन्द्र दी

ताकत ते हिम्मत बदी गेदी ही उसनै बज्जर चलाईए राजे बलि दी मुण्डी बड्डी ओड़ी । असुरें बिच हाहाकार मचो गेया । असुरें दे गुरु शुक्राचार्य जी गी मृत संजीवनी-मोए दे गी जीन्दा करने आली बिद्या औन्दी ही । उनें राजा बलि गौ फी जीन्दा करी लैता । राजा बलि गी अशीर्वाद दइए शुक्राचार्य होरे इन्द्र कन्नो लड़ने गी टोरेआ । उस बारी राजा बलिनै इन्द्र गी जित्ती लैता । सारे देवते डरिऐ ताई' तुआई' नस्सन छप्पन लगे । देवतें दी माऊ अदिति नै जिसलें उन्दी ए दुर्दशा दिक्खी ते बचारी बड़ी दुःखी होई । उसनै अपने पति कश्यप होरेंगी आखेआ माढ़ी साकनां दे जागतें माढ़े पुत्तरें दा राज खोई लैता ए । कोई नैआ उपा करो जिस करी ओ मुड़िऐ रस्सन बस्सन । कश्यप बचारे भले फसे । देवते ते असुर दोऐ उन्दी लुआद हे । उन्दे आस्तें दोऐ बरोबर हे । ओ कुसै दा बुरा नई' हे चांदे । फी बी उनें पतिव्रता अदिति गी खुश करने गीतें 'पयोव्रत' नां दा बरत दस्सेआ अदिति नै बारां दिन ओ बरत कीता । उस बतें दी किरपा कन्ने भगवान नै नुआढ़े घर जन्म लैता । ओ इन्ने लौके ते गिट्ठ-मरिट्ठू हे जे उन्हे गी सारे बामना आखन लगे । कश्यप जी नै बामन जी गी आपू' जनेऊ पुआए । जनेऊएं बेलें जागत भिख्या मंगदा ए । भगवान बामन जी न अपना मतलब पूरा करनां हा । ओ भिख्या लैन राजा बलि कोल गे ।

राजा बलि नर्मदा नदी कण्ठे जग करे करदे हे ।
 बामन जी उत्थे पुज्जे उन्दे तेज कन्ने सारे चबात
 होई ग । राजा बलि नै उने गी बहालेआ, पूजा कीती ते
 पुच्छेआ—ब्रह्मचारी जी अऊं तुन्दी के सेवा करां ? बामन जी
 आखन लगे—अऊं किश मंगन आयां । बचन दे ते मंडा ।
 बलि नै हस्सिए आखेआ—अऊं त्रौणे लोकें दा स्वामी आं ।
 बचन लैने दो के लोड़ ऐ ? जे किश मंगना ऐ मंगो अऊं
 बेट । शुक्राचार्य नै बलि गी ठाकेआ । बिनां सोचे हामी भरी
 लैनां मूर्खता हुन्दी ऐ । ए विष्णु भगवान लुकी धोवखा देन
 आये न । राजा बलि आखन लगा बचन ते अऊं दई वैठां
 जेकर ए विष्णु न तां के करडन । सारा राज लई लैडन ।
 कोई हर्ज नई । अऊं लोकें दी हसोआनी कोला डरनां ।
 गरीबी कशा नई डरदा । बामन न नुआड़िए त्रौणें पीड़िए
 दी बड़याई कीती ते फी अपने पैरें दे नाप जिन्नी त्रै कदम
 जमीन दान मंगी । बलि हस्सिए आखन लगा—अड़या गल्लां
 ते बड़ियां बुजुर्गे आलियां करनां एं पर बभोन्दा ईऐ जे
 थुआड़ी अकल बी थुआड़े कद्दें जिन्नी गै । तू धरतो दा इक
 टापू मंगी लै अऊं ओ बी खुशी कन्ने देई ओड़ड ।
 अऊं त्रिलोकीनाथ आं । तुस मिकी हसाने आस्तै
 अपने कदमैं जिन्गी त्रै कदम जमीन मंगा करदे ओ । ए कोई


स्थानी गल्ल नईं । तुस मुड़िए सोचो ते होर किश मंगो ।
 बामन जी आखन लगे असें ब्रह्मचारिएं गी जिन्नी लोड़ हुन्दी
 ऐ उन्नी गै संगनेआं । चीज में जे किश मंगेआ ऐ ऊऐ देओ ।

राजा बलि नै अपने गुरु शुक्राचार्य जी दा आखा नईं
 मन्नेआ । उसनै हथै बिच जल लईए त्रै गैं जमीन दान
 देने दा संकल्प करी ओड़ेंआ । उस बेलै भगवान ने अपना
 देह बदाना शुरू कीता । ते विराट पुरुष बनी गे । त्रैवै
 लोक ते चौदां भुवन उन्दे बिच न । भगवान नै इक गै
 पुट्टी ते सारी पृथ्वी मिनी लैती । दूई गैं पुट्टी तां उप्परले
 सारे लोक मिनी लैते । त्रिए कदम आस्ते कोई थां गै नईं
 बचेआ । बामन जी नै बलि गी आखेआ—लै भई बड़ा गमान
 करा करदा साएं त्री गैं आस्तै थां दस्त । राजा बलि नै हथ
 जौलै करिए आखेआ हे प्रभु ! माढ़ी पिठु मिनिऐ त्रीआ
 कदम पूरा करी लौ । बामन जी नै आखेआ—शाबाश ।
 थुग्राड़ी धर्मे बिच एड्डी अटल बुद्धि दिक्खिए अऊं बड़ा खुश
 होआं । अऊं अपने भगतें दा धन ते ऐश्वर्य खोई लैनां ।

इस करी जे उन्दा मन माढ़े बिच लगा रवै । दुःख
 कष्ट होन तां गै लोक मिकी चेतै करदे न । धन ते सुख
 आदमी गी अन्ना करी ओड़दे न । तूं अपने साथिएं कन्नें

हेठ सुतल लोकै बिच जा उठी । उत्तयें तू इन्द्र कोला बी
जादा ऐश्वर्य भोगगा । अऊं थुआड़ी डयोढी दा पैरा
देड । सार्वणि मन्वंतर आँग तां तू सुर्गा दा राज पाईए
इन्द्र दी पदवी उप्पर बाँगा ।

भगवान दी आज्ञा सुनिऐ राजा बलि अपने साथिएं कन्ने
सुतल लोकै गी गेआ उठी । ईआं बामन जो नै बलि कोला
राज खोईए अपने भ्राऊ इन्द्र गी दई ओड़ेआ ।



मच्छ अवतार

जिसलै पृथ्वी सुर्ग ते इन्दे बिचला लोक पाणी-बिच
डुब्बी जन्दे न उसी लौका 'प्रलय' आखदे न । उस बेलै
ब्रह्मा जी नीन्दर लैन्दे न । पिछले 'प्रलय काल' दे समे
ब्रह्मा जी ईश्रां गै सुत्त दे हे ते हयग्रीव नां दा राक्षस उन्दे
मुंहा बिचा बेद कडिऐ लई गेआ हा । ओ दैत्य समुद्र बिच
रौन्दा हा । उसी मारने ते बेदे दी रक्षा करने गीतै भगवान
नै मच्छ रूप धारेआ हा । एदी कथा ईश्रां ऐ-सत्यव्रत नां
दे इक महात्मा राजा हे । ओ कृतमाला नदी बिच शनान
करिऐ देवतें ते पितरें गी तर्पण करदे हे । 'प्रलयकाल' कोला
पैलै इक दिन ओ तर्पण करा करदे हे । उन्दी औजली बिच

इक लौका नेआ मच्छी दा पोआ आई गेआ । राजे नै उसी
 पानी बिच सुट्टी ओड़ेआ । ओ पोआ आखन लगा अऊं
 बड़ा लौका ते निर्बल आं । मिकी बड्डियां मच्छियां खाई
 जाडन । अऊं थुआड़ी शरण आं । माढ़ी रक्षा करो ।
 राजे नै तरस खादा ते उसी कर्मण्डलु बिच पाईए ते आश्रम
 बिच लई आये । इक्कै रातीं बिच ओ पोआ बड्डा होई
 गेआ । ते राजा गो आखन लगा कर्मण्डलु बिच मिकी कष्ट
 हुन्दा ऐ । कुसै बड्डे नेए थार रक्खो । राजा नै उसी
 बड्डे भाण्डे बिच पाया । ओ कोई दौं घड़िएं बिच त्रै हत्थ
 मठोई गेआ । फी कुसै बड्डे थारै गीतै आखन लगा ।
 राजा नै उसी इक तला बिच पाई ओड़ेआ मच्छी
 उत्थे होर बड्डा होई गई । राजा नै उसी इक सरै बिच पाई
 ओड़ेआ । ओ उत्थे बो नईं ससीऐ । फी राजा नै उसी
 इक भीला बिच सुट्टेआ । ओ उत्थे होर बड्डा होई ते राजे गो
 बेनती करन लगी । राजा बड़ा हरान होआ । उसनै उसी
 समुद्र बिच सुट्टी ओड़ेआ । ओ आखन लगी इत्थे बडे
 बड्डे २ जीव न । मिकी खाई जाडन । इत्थे नईं छोड़ो ।
 राजा आखन लगा—तुस कुन ओ ? मिकी की हरान करा दे
 ओ ? तुस ते कोई भगवान दा रूप लबदे ओ । ममूली मच्छी
 बिच नेइआं गल्लां नईं हुन्दियां । मच्छ रूप भगवान बोले तू
 ठीक बुझी लैता ऐ । अज्जै कोला सतमें रोज ए त्रै वै

लोक पाणी बिच डुब्बी जाडन । उसलै इक किशती तरदीर
थुआड़े कच्छ औग । तूं अन्न, बी, ते सारें जीबें दा इक इक
जोड़ा लईऐ उप्पर बई जायां । ओदे उप्पर सप्तरिषी बी
बैठे दे होडन ।

जिन्नां चिर प्रलय काल रौग ओ किशती बी तरदी रौग ।
सप्तरिषिं दी लो तुकी न्हेरे दा कष्ट नईं होन देग । ते
जिसलै बड़े जोरा दे फण्डाके औडन तां अऊं तुकी बचाने
गीतें किशती अगगे आई जा करड । तूं वासक नागा दी
रस्सी बनाइऐ उस किशती गी माढ़े इस सनहरो सिडा कन्नें
बन्नी आड़ेआं । ए आखिए मच्छ भगवान नै सुमुद्रै बिच
चलोबी लाई ओड़ी, ते लोप होई गे । जीआं २ भगवान
नै आखेआ हा ऊंआं २ गै होआ । राजा सत्यव्रत प्रलय
काल बिच किशती बिच ताई तुआई फिरदा रौन्दा हा ।
मच्छ भगवान नै उसी तत्वज्ञान दा उपदेश दित्ता, ह्यग्रीव
दैत्य गी मारेआ ते बेदें दी रक्षा कीती ।



राजा अम्बरीष

सूरज बन्सी राजा नाभाग दा पुत्तर अम्बरीष बड़ा तेजस्वी ते भगवान दा भगत हा । ओ ब्राह्मणें ते भगतें दा बड़ा मान करदा हा । इक बारी अम्बरीष नै इक्क बरा कास्तियां रखने दा निश्चा कीता । कत्तक सुदी कास्ती गो ए बर्त मुकना हा । राजा नै मथरा जाइए निर्जल बर्त कीता । दुआस्ती आलै रोज जिसलै किश चखिए बर्त पुआरन लगा तां उसै बेलै बड़े तेजस्वी ऋषि दुर्वासा होर उत्थे आई गो । राजा नै उनें गो मत्था टेकेआ ते भोजन करने गीतै बेनती कीती । दुर्वासा होर आखन लगे अऊं जमना कण्डै सन्ध्या करी आंवां फी रूटी खाड । ए आखिए

ओ नदी कण्ठ उठी गे । उत्थे स्नान ध्यान ते पूजा पाठ
 करदे चिर लग्गी गेआ । ताईं पासै राजा गी ब्राह्मणें आखेआ
 अज्ज दुआस्ती थोड़ा चिर ऐ । मसां इक घडी रही गई ऐ ।
 दुआस्ती हुन्दे गी बर्त पुआरी लौ । त्रयोस्ती लग्गी जाने पर
 बर्त पुआरो तां बर्त बिरथा होई जन्दा ऐ । शास्त्रें बिच
 ईआं लिखेदा ऐ । राजा गी किश थो नईं आवै । जेकर
 बर्त नईं पुआरदा ते दुर्वासा जी गी बल्गदा रौन्दा ऐ तां
 कास्ती दा बर्त बे-अर्थ होई जन्दा ऐ । ते जेकर दुर्वासा जी
 दे आने दे पहलें उनेंगी भोजन कराये बिनां आपू पुआरी
 लैन्दा ऐ तां दुर्वासा होर जेड़े अगें गे रोहे दे भंडार न जरूर
 मै रोए होईऐ उसी आप दई ओड़डन । ब्राह्मणें सलाह
 दित्ती तुस शालग्राम जी दी मूर्ति गी स्नान दइऐ चरणामृत
 पी लौ । ईआं बर्त बी पुआरी लैगेओ ते कन्नें अतिथि गी
 भोजन कराये बिना खाई लैनें दा पाप बी नईं लग्गन ।
 शास्त्रें बिच लिखेदा ऐ जे पानी पीना भोजन करने बरोबर
 ऐ । ते कन्नें ओ भोजन नईं बी हुन्दा । राजा अम्बरीष
 नै ऊंआं गे कीता । इन्नें बिच दुर्वासा जी परतोई आये ।

उनें गी तपोबल कन्हें पता लग्यो गेआ जे राजा नै बतें
 पुआरी ओड़ेआ ऐ । बस फी के हा आखो जे रुंऐ दे ढेरें
 च विग्याड़ी पई गई । पैलें ते उनें राजे गी खूब फण्ड
 चाढ़ो फी बो सन्दोख नईं होआ तां उसो मारने गीतैं इक
 चड़ेल बनाई सुट्टी । ओ डैन राजा गी खाने गीतैं
 द्रौड़ी पर भगवान ते अपनं भगतें दे रखवाले न ।
 भगवान दा सुशंन चक्कर चलेआ ते ओ भस्म होई गई ।
 भगवान अम्बरीष दी रक्षा गीतैं पैलें गे सुदर्शन चक्कर
 लेईए खडोते दे हे उस चड़ेल गी मारिए बी चक्करें गी
 सन्दोख नईं होआ । ओ राजा गी सताने आले दुर्वासा ऋषि
 पिच्छें द्रौड़ेआ । दुर्वासा होर जिन्द बचाने गीतैं नस्से ।
 जित्थें जान, चक्कर पिच्छें पिच्छें जा । दुर्वासा ऋषि होर
 इन्द्रलोक जमलोक, ब्रह्मलोक, शिवलोक, आदि सारे लोकें
 बिच फिरे ते सारे देवतें कोल जिन्दू दी भिक्ख संगन गे पर
 कुसै हामी नईं भरी । आखन लगे विष्णु भगवान दा
 कसूर करने आले गी अस नईं बचाई सकदे । हारिए
 दुर्वासा होर विष्णु लोक पुज्जे । विष्णु जी आखन लगे
 ब्राह्मण देवता, अरुं ते भगतें दे अधीन आं । इस मामले

बिच अऊं किश नईं करी सकदा । तुस राजा अम्बरीष
 कोल गै जाओ । बेबस होएदे मुनि होर राजा दी शरण
 आये । ते आखन लगे 'हे राजा, माढ़े पाप बखशो ते
 सुदर्शन चक्कर कशा माढ़ी जिन्द छड़काओ । ए आखिए
 राजा दे पैरें डिगी पे । राजा नै उनें गी पुड़शी लैता ते
 आखन लगा राम, राम मिकी कण्डे बिच नईं घसीटो, तुस
 साढ़े पूज्य बाह्यण देवता ओ । अऊं तुन्दे चरणों दा सेवक
 आं । ए आखिए राजा नै सुदर्शन चक्कर दी बेनती कीती ।
 राजा दी बेनती सुनिए सुदर्शन चक्करै नै अपना
 तेज सङोड़ी लेआ । दुर्वासा हुन्दी मसां जान बची पर
 तपोबलै दा गमान भला ब्रूहा ।



राजा हरिश्चन्द्र

राजा हरिश्चन्द्र बड़े सत्तवादी हे जेड़ी गल्ल इक बारी उंदे मुंहां निकली जा ओ सच्च करिए छोड़दे हे भावें ओदे लेई उनें गो किन्ने बी कष्ट भोगने पौन । उंदी रानी शैव्या ते पुत्तर रोहिताश्व बी बड़े धर्मी ख्यालें दे ते राजा दे आज्ञाकार हे । राजा दे सच्च धर्मे दा इन्ना प्रताप हा जे उंदी प्रजा च हमेशा नंद मंगल हुन्दे रौन्दे हे, बरखा मौके उप्पर बरदी ही बूटे खूब फल दिंदे हे ते देवी देवते हमेशा उन्दे देसै उप्पर खुश रौन्दे हे । सुरगें दा राजा इन्द्र बी राजा हरिश्चन्द्र गी बड़ा मान दिंदा हा ते दिनें तयारें उप्पर उनें गी सद्दिए सिंहासनै उप्पर अपने कर्ने बहालदा हा ।


इक बारी ऋषि विश्वामित्र हुं दी बैस छिड़ी पेई हरिश्चन्द्र
 दी सत्तवादिता उप्पर । इन्द्रसभा आलै आखदे हे जे चन्त
 सूरज अपना सिद्धान्त छोड़ी देन पर राजा हरिश्चन्द्र अपना
 सत्यवर्त कदे नी छोड़ग विश्वामित्र होर आखदे हे पेई सत्य
 बरतै उप्पर दृढ़ रौना बड़ा कठन ऐ । सुखे भोगे च पले दा
 राजा नैई नभाई सकदा । बैस मुकने च नैई आवै खीरिऐ
 फैसला होआ जे परीख्या लेईऐ दिखना चाईदा ऐ ।
 विश्वामित्र होरें गी ए कम्म सपुर्द होआ । विश्वामित्र होर
 भट राजा हरिश्चन्द्र कोल जाई पुज्जे ते आखन लगे 'महाराज
 मिकी इक सुखना आया ऐ । में चाहना ओ सुखना सच्च
 होई जा पर उसी सच्च करने दी समर्था तुन्दे च गै जे तुस
 वचन देओ तां दस्सां । "मे जरूर तुन्दा सुखना सच्च
 करड'" हरिश्चन्द्र आखेया । विश्वामित्र बोले—

"में दिक्खेआ ऐ जे तुसें अपना सारा राज मिकी दान
 करी दित्ता ऐ । तुस सत्यवादी ओ । अपना राज ते
 सारी प्रभुता मिकी दान-दइऐ सुखने दे दान गी सच्चा साबत
 करो । राजा नै आखेआ एदे कशा बड़ी खुश-किस्मती के

होनी ऐ, लौ राजगद्दी ते राजमुकट । अज्जै थमां तुस राजा
 होए ।” विश्वामित्र आखन लगे तुसें एड्डा महादान भिकी
 दित्ता । हुण नाढ़ी दक्खनां बी देखो । एडे महादान दी
 दक्खना घट्ट कोला घट्ट त्रा हजार मोहरां लोड़चदी ऐ, बाँर
 दक्खना दान बे-अरथा होई जंदा ऐ । राजा आखन लगा
 ओबी अऊं खजाने बिचा नुआई दिन्नां । ऋषि आखन लगे
 खजाना हुन राजे दे कन्ने गे मेरा होई गेआ । थुआड़ा
 कुत्थुआं रेआ । ए मोहरां बक्खरींआं देखो । राजाने भुनि
 दिआं मोहरां चकाने गीतें काशी आनिए बीएँ हजारें बिच
 अपनी रानी तारामती ते पुत्तर रोहित गो बेची ओड़ेआ ।
 दस हजार मोहरें कन्ने अपने आपैगी इक भंगी अगगे बेचेआ ते
 ऋषि हुन्दी दक्खना चकाई ।

रानी इक सेठ दे घर दासो बनिए रौन लगी ते राजा
 मसानघाट उपपर मुर्दे जालने दा कराया ग्राहने दा कम्म
 करन लगा । तांमो राजा नें जिगरा नईं छोड़ेआ । ऋषि
 नें परीक्षा होर बी कठोर कीती । उसने सप्प बनिए रोहित
 गो बागै बिच डंग मारेआ । रानी कोल मसां इक्कें लाने
 आली धोती ही । कप्फन पाने गीतें बी होर कोई टल्ला
 खरीदने दी तफीक नईं ही । रानी नें अपनी धोती पाड़ी ।
 नुआड़े बिच जागतें दी लोथा गो प्लेटेआ । ते मसानघाट
 उपपर फूकने गीतें लई आई । ओ ब्याकल होई दी रोआ

तड़फा करदी हो । रानी दी ए दशा ते पुत्तरे दी मौत
 दिक्खीऐ बी राजे दा जिगरा नईं कम्बेआ, नईं डोलेआ ।
 उसनै रानी कशा मसान घाटै उप्पर मुर्दा फूकन दा कराया
 मंगेआ । रानी रोइऐ आखन लगी अऊं कुत्थुआं देआं,
 राजा ने आखेया 'मैं इन्ना चिर मुर्दा फूकने दी आज्ञा नेईं
 देईं सकदा परीक्षा दी हद होई गई । विश्वामित्र नै आनिए
 राजे गो गलें लाइ लेआ ते आखेआ—राजा मन्ती लैता तू
 पक्का धर्मात्मा ते सत्यवादी एं । ए लै अपना राज । में
 थुआड़ी परीक्षा लैती पर तू अगो चा खरे सुन्नै आडू ठीक
 निकलेआ एं । जदू तोड़ी ए धरत ते इमान रौंडन थुआड़ा
 नां अमर रौग । भगवान विष्णु नै बी प्रगट होइऐ दर्शन
 दित्ते । रोहित बी जीन्दा होई गेआ । ओ भंगी जिस नै
 राजा गो मुल्लें खरीआ हा ओ साक्षात धर्मराज हे ।
 धर्मराज नै प्रकट होइऐ राजे गो गलें लाया देवतें फुल्लें दी
 बरखा कीतो ते सच्च धर्म दी मैहमां दे गीत गाए ।



रामचन्द्र जी

सूरजबन्सै बिच राजा दशरथ इक बड़े प्रतापी राजा होए । उन्दियां कौशल्या, सुमित्रा ते ककेई नां दियां त्र पटरानियां हियां । पर पुत्तर कुसै दे नई होआ । अपने परोहित वसिष्ठ हुं दे आखने उप्पर राजा नै शृंगि ऋषि गो अपन देस सही भेजेआ । उने राजा कोला इक जग कराया । उस जगा दे प्रभाव करिऐ राजे दे घर चार पुत्तर होए । कौशल्या दे रामचन्द्र जी, सुमित्रा दे लक्ष्मन ते शत्रुघ्न जी, ते केकई दे भरत जी जम्मे । रामचन्द्र जी बड़े प्रतापी ते भगवान दा अवतार हे जिसलै ओ बिद मठोए तां विश्वामित्र मुनि अपने जगै बिच विघ्न करने आले राक्षसें

गी मारने गीतै राम ते लक्ष्मण गी राजा दशरथ कशा मंगीऐ
 लई गे । उनेँ दौनेँ गी बड़े अस्त्र-शस्त्र चलाने सिखाये ।
 रस्ते बिच उनेँ गौतम-हुन्दे श्राप कनेँ सिल
 होई गई दी अहल्या गी तारेआ । रामचन्दर जी दे चरणेँ दी
 धूड़ लगदे गै ओ तरी गई । ताड़का राकशी, मारीच ते
 सुबाहु नां दे राकशेँ गी मारेआ । ते विश्वामित्र जी दा
 जग तोड़ छाढ़ेआ ।

विश्वामित्र जी दौनेँ भ्राएँ गी मिथिला पुरी राजा
 जनक दी नगरी लई गए । उत्थेँ शिवेँ दा इक बड़ा भारा
 धनुष रखेदा हा । बड़े बड़े जोधा बी उसी नईं चुक्की
 सकदे हे राजा जनक नेँ अपनी मति गै शैल धियु सीता दे
 स्वयंवर गीतै ए शत रखी दी ही जे जेड़ा शूरवीर इस धनुषेँ गी
 लफाड़े एदे उपपर डोरी चाढ़ी लैग ओदे कनेँ सीता दा व्याह
 करी ओड़गे । ए गल्ल सुनिए बड़े बड़े शूरवीर उत्थेँ
 आईगे । पर कुसे कशा बी धनुषेँ उपपर डोर नईं चढ़ी ।
 ते कोई बी सीता गी प्राप्त नईं करी सकेआ । रामचन्दर
 जी गी गुरु जी दी आज्ञा होई ते उन्हेँ धनुषेँ गी खब्बे हत्थेँ
 कनेँ चुक्की लैता ते एडे जोरे कनेँ लफाया जे ओ गन्ने दी
 मट्टी अड़ू भभाटआ त्रुट्टी गेआ । उस धनुषेँ दे त्रुटने करी
 बड़े जोरे दा शब्द होआ ते शूरवीर भगवान परशुराम जी

उत्थें आई पुज्जे । ओ शिवें दे चले हे । गुरु दा धनष
 त्रुट्टने करो उनें गो बड़ा रोह आया । रामचन्दर जी गो
 आखन लग "जेकर तुस एडे गै बीर ओ, तां ए लौ नारायण
 धनष । एदे उत्पर बाण चाड़िए दस्सो । रामचन्दर जी
 ने भट्ट गै ऊं आं करो दस्सेआ । परशुराम जी गो जकीन
 होई गेआ जे ए भगवान दे सवा होर कोई नई । उन्दा
 मान त्रुट्टी गेआ । उनें रामचन्दरें दी डी स्तुति ते सराहना
 कीतो ते ओ अपने आश्रमं गो परतोई गे । राजा जनक नै
 अपनी ते अपने आएं दी धिएं कन्ने राम, लक्ष्मण, भरत ते
 ते शत्रुघ्न दा ब्याह करी ओड़ेआ । दशरथ चौने पुत्तरें गो
 ब्याहिए अजुध्या परतोई आये ।

राजा दशरथ बृद्ध होई गे दे हे । रामचन्दर जी गो
 राजगद्दी सौंपने दा बवार कीता । पर राजे दो निगड़ी ते
 ते पयारी रानी केकई गो नुआड़ी दुष्ट दासी मन्थरा नै नई
 पट्टी पड़ाई जे उसनै विघ्न पाई ओड़ेआ । इक बारी राजा
 दशरथ नै रानी केकई गो दौं बरदान दिते हे । केकई नै
 उसलै ते किश नई मंगेआ, आखेआ फी कदे लोड़ पई तां

मंगी लैड । इस बेलै आखन लगी ओ दो बर पूरे करो ।
 इक्क संगेआ जे राजगद्दी साढ़े पुत्तर भरतै गी देओ ते
 दूआ संगेआ जे रामचन्दरें गी चौदें बरें दा बनवास देओ ।
 राजे दे खानेआ निकली गई । ओ ए धक्का नईं जरी
 सके ते पछाड़ खाईए डिगगी पे राम उनें गी जिन्दू कशा बी
 प्यारे हे । राजा नै, बशिष्ठ मुनि नै ते सारें सर्वन्धी मित्र
 केकई गी मता समझाया पर उस अपनी जिह नईं छोड़ी ।
 राम जी गी जिसलें ए खबर थोई ओ झट पिता कोल पुज्जे ।
 केकई नै दिक्खेआ जे दशरथ होरें अपने मुहां दा ते
 रामचन्दर जी गी बनै गी जाने आस्ते आखना नईं । उसनै
 रामचन्दर जी दे स्वाल पुच्छने उपर सारी गल्ल सनाई ते
 कन्नै ए बी आखेआ जे बब्बै दी गल्ल तोड़ चाढ़ने गीतै तुसै
 गी बनै गी टुरी जाना लोड़चदा ऐ । रामचन्दर जी बड़ी
 खुशी कन्नै एदे आस्तै तयार होई गे । उनें गी राज छोड़िए
 बन जाने दा बिन्द बी दुःख नईं होआ । रामचन्दर जी
 कन्नै सीता जी ते लक्ष्मण बी तयार होई गे । ते बनैगी
 टुरी पे । राम जी दे टुरी जाने परैन्त पुत्तरा दे बजोगै

बिच राजा दशरथ दे प्राण निकली गे । उन्दी लोथ तेलें
 बिच रखीऐ गुरु बसिष्ठ जी नै भरत शत्रुघ्न जी ननिहाला
 दा सहैआ । भरत नै आनिए जिसलै सारी गल्ल सुनी, उनें
 माऊ जी बड़ा फटकारेआ । भरत नै पिता दा किरया कर्म
 कीता ते फी अपने आऊ जी परताई आनने गीतें चित्रकूट दी
 जात्रा कीतो । उन्दे कन्ने सारे नगर बासी, गुरु बसिष्ठ जी
 ते सारा टब्बर गेआ । रस्ते बिच उनें जी रामचन्दर जी दा
 परम मितर निषाद मिलेआ । निषाद नै रस्ता दस्सेआ,
 गंगा टपाई ते भरत होर चित्रकूट पुज्जे । उन्दी राम जी
 कन्ने मलाटी होई । राम जी परतोनें गीतें नई मन्ने ।
 लचार होईऐ भरत नै उन्दियां खड़ाबां लईआं ते अजुध्या जी
 परतोई आये । आऊ दे परम भगत भरत जी नै खड़ावां
 राज संहारनै उपर रखियां ते आपूँ शहरें दे बाहर नन्दी गां
 बिच आश्रम बनाईऐ रौन लगे । ते रामचन्दर जी दे नां
 उपर राज चलान लगे । श्री नंदी गां बिच बिल्कुल
 तपस्विएं आडू गे रौन लगे ।

तुआई रामचन्दर जी दण्डकारण्य नां दे बनै बिच पुज्जे ।

उत्थें रावण दी भैन शूर्पनखां उन्दें उप्पर मोहित होई गई ।
 लक्ष्मण ने नुआड़े नक्क कन्न बड्डिए उसी बुच्चा
 करी ओड़ेआ शूर्पनखा अपने भ्राएं खरदूषण ते त्रिकटा
 अगें रोई । ओ राक्षस चौदां हजार फौज लइए राम चन्दरें
 कन्न लड़न आये । राम चन्दर जी नै इक्कलै गै मकाबला
 कीता ते सारें गी मारी ओड़ेआ । फी शूर्पनखा लंका
 बिच अपने भ्राऊ रावणै कश जाई फर्यादी होई । रावण
 नै मारीच राक्षस गी राम जी दे आश्रमे गी भेजेआ । ओ सुन्ने
 दा हिरण बनिए उत्थें फिरन लगा । सीता नै राम जी
 गी आखेआ ए हिरन मिगी फगड़ी देओ । जिस बेलै ओ बड़ा
 हठकरन लगी तां राम जी नै आश्रमै दी राखी आस्तै लक्ष्मण
 गी आखेआ ते आपूँ हिरनै पिशें द्रौड़े । मारीच उन्नै गी
 बड़ी दूर लई गेआ । रामचन्दर जी नै कस्सीए बान
 मारेआ । ओ मायाधारी राक्षस हा । उसनै रामचन्दरें दे
 ग्लानी बिच जोरेआं लक्ष्मण गी बाज मारी । सीता धोखे
 बिच आई गई । उन्न लक्ष्मण गी भटपट राम जी दी
 सहायता गीतै जाने गी आखेआ । लक्ष्मण जा नई, ते सीता
 ताने-मोने देन लगी । मजबूर होइए लक्ष्मण गेआ ।
 पिशुआं रावण आया ते सीता गी चराइए लई गेआ ।

रस्ते बिच जटायू नां दे इक इल्लड़ै कन्ने नुआड़ी लड़ाई होई । रावण नै उसी जख्मी करिए सुट्टी ओड़ेआ । जिसलै राम जी परतोइए आश्रमै गी आये उत्थे सीता नई लब्बी । ओ व्याकल होईए सीता गी तुप्पन लगे । रस्ते बिच उनें गी अधमोआ जटायू लब्बा उन्न राम जी गी दस्सेआ जे सीता गी रावण चराइए लई गेआ ऐ । अगें जटायू दे मुंहां बोल नीं निकले ते ओदे प्राण निकली गे । जटायू राम जी दे पिता दा मित्तर हा । रामजी ने बसाठियां किठियां कीतियां, चिखा बनाई ते जटायू दा दाहकर्म करी ओड़ेआ ।

ऋष्यमूक पर्वतें उपपर सुग्रीव नां दा इक मक्कड़ रौन्दा हा । नुआढ़ा आ बाली बड़ा तगड़ा हा । ओ बान्दरें दा राजा बाली इकबारी रावण नेए शूरवीर राक्षसै गी कच्छे हेठ मारिए सारी पृथ्वी दा चक्कर लाई आया हा । उसी इक बारी रोह चढ़ेआ ते उसने अपने आऊ गी मारेआ कुट्टेआ ते घरा कडु लाया, ते नुआढ़ी लाड़ी गी अपने घर रक्खी लैता । इसकरी सुग्रीव बड़ा दुःखी हा । सुग्रीव दे बजीर

ਹਨੁਮਾਨਾ ਨੈ ਰਾਮਚੰਦਰੇ ਦੀ ਨੁਆਫੇ ਕਨੇ ਪਸ਼ਾਨ ਕਰਾਏ । ਸੁਗ੍ਰੀਵ
 ਤੇ ਰਾਮਚੰਦਰ ਜੀ ਦੀ ਮਿੱਤਰੀ ਹੋਏ ਗਏ । ਨੁਆਫੇ ਗੀਤੈ
 ਰਾਮ ਜੀ ਨੈ ਬਾਲੀ ਗੀ ਮਾਰੇਆ । ਸੁਗ੍ਰੀਵ ਨੈ ਬੀ ਸੀਤਾ ਗੀ
 ਤੁਧਨੇ ਆਸ਼੍ਰਿਤੈ ਬਾਨ੍ਦਰੇ ਗੀ ਚੀਨੇ ਪਾਸੇ ਟੋਰੇਆ । ਹਨੁਮਾਨ ਜੀ
 ਦਕਖਨ ਗੇ, ਸਮੁਦਰ ਟਪੇਆ ਤੇ ਲੰਕਾ ਪੁਰੀ ਬਿਚ ਜਾਏ ਸੀਤਾ ਗੀ
 ਤੁਧੀ ਕਛੇਆ । ਹਨੁਮਾਨ ਪੈਲੇ ਤੇ ਸੀਤਾ ਗੀ ਮਿਲੇ, ਫੀ ਰਾਵਣ
 ਦੇ ਪੁੱਤਰ ਅਕਸ਼ਯਕੁਮਾਰ ਗੀ ਮਾਰਿਏ, ਅਸ਼ੋਕ ਵਾਟਿਕਾ ਜੁਆਡੀ, ਤੇ
 ਲੰਕਾ ਗੀ ਫੂਕਿਏ ਰਾਮਚੰਦਰ ਜੀ ਕੋਲ ਪਰਤੋਏ ਆਏ ।
 ਰਾਮ ਜੀ ਨੇ ਬਾਨ੍ਦਰੇ, ਲਮਕੂਰੇ ਤੇ ਰਿਚਛੇ ਦੀ ਸੈਨਾ ਬਨਾਏ ਤੇ ਰਾਵਣ
 ਉੱਪਰ ਚੜਾਏ ਕਰੀ ਦਿੱਤੀ । ਸਮੁਦਰ ਉੱਪਰ ਪੁਲ ਪਾਯਾ ਤੇ
 ਉੱਥੇ ਗੇ ਰਾਮੇਸ਼ਵਰ ਮਹਾਦੇਵ ਜੀ ਦੀ ਸਥਾਪਨਾ ਬੀ ਕੀਤੀ, ਜੇਦੀ
 ਮਾਨਤਾ ਅੱਜੇਂ ਤਕਰ ਚਲੀ ਆਵਾ ਕਰਦੀ ਏ । ਹੁਨ ਉਨੇ ਪੁਲੇ ਰਸਤੇ
 ਟਪਿਏ ਲੰਕਾ ਗੀ ਜਾਏ ਘੇਰੇਆ । ਧਮਸਾਨ ਜੁਧ ਹੋਆ ।
 ਰਾਮ ਜੀ ਨੇ ਰਾਵਣ ਦੇ ਪੁੱਤਰ ਮੇਘਨਾਦ ਗੀ, ਨੁਆਫੇ ਆਠ
 ਕੁੰਭਕਰਣ ਗੀ, ਤੇ ਰਾਵਣ ਗੀ ਮਾਰੀ ਆਏਆ । ਰਾਵਣਾ ਦਾ
 ਆ ਵਿਭੀਸ਼ਣ ਪੈਲੇ ਗੇ ਨੁਆਫੇ ਕਸ਼ਾ ਬੇਝਜਤ ਹੋਏ ਰਾਮ ਜੀ
 ਕਨੇ ਆਨੀ ਮਿਲੇ ਦਾ ਹਾ । ਉਸਨੈ ਰਾਮ ਜੀ ਦੀ ਬੜੀ ਮਦਦ

कीती । रावण दे मरी जाने परैन्त राम जी नै उसी लंका
दा राजा बनाई ओढ़ेआ । फी राम जी नै रावण दा पुष्पक
विमान मंगाया । ओदे उप्पर सीता, लक्ष्मण, विभीषण,
हनुमान, सुग्रीव ते होर कई उंदे सहायक मित्तर बहिए
अजुध्या गी परतोए ।

हनुमान दे मुर्हा दा राम जी दे आई जाने दा समाचार
सुनिए भरत ते शत्रुघ्न अगें आइए रामचन्दरें गी मिले ।
अजुध्या बिच सारे पासै नन्द गे नन्द होई गेआ । राम जी
नै तपस्वी भेस तुआरेआ, इनान कीता । ते राजें आले शैल
टल्ले लाये । बसिष्ठ जी नै राज सिंहासन उप्पर बहालिए
उन्दा राजतिलक कीता । रामचन्दर जी नै प्रजा गी बड़ा
सुख दित्ता ते पुतारे आंडू ओदी पालमां करन लगे ।



श्री परशुराम जी

परशुराम जी दे पिता दा नां जमदग्नि हा ते माऊ
दा रेणुका । ए बड़े शूरवीर ते क्रोधी ब्राह्मण हे । उने
माहिष्मती पुरी दे राजा अर्जुन जी मारेआ । अर्जुन दे
हजार हत्थ हे ते ओ एडा बली हा जे इक वारी उसने राक्षसे
दे राजा रावण जी वी बन्दी पाई लेआ हा । ओ सहस्रबाहू
इकरोज बने बिच शकार खेडन गेआ । ईआं गे फिरदा

फरान्दा जमदग्नि ऋषि दे आश्रमैं बिच आई पुज्जा ।
 जमदग्नि ऋषि नै जेदा बड़ा सत्कार कीता । ऋषि
 कोल इक कामधेनु गौ ही जेदे करी जमदग्नि ऋषि नै उसै
 गवैं दी बढौलत राजा गी ते ओदी सारी सैना गी राजें आला
 भोजन कराया ते मान सत्कार कीता । ए दिक्खिए
 सहस्रबाहु ओ कामधेनु गी ऋषि कोला संगन लगा ।
 ऋषि नै नईं दित्ती, राजा जबरदस्तो खोलिए लई चलेआ ।
 इन्हें बिच परशुराम जी आई पुज्जे । एडी बेन्याईं सुनिए
 ओ शस्त्र लइए राजा पिशें द्रौड़े । ते उसी जाई दबकाया ।
 बड़ा घोर युद्ध होआ । परशुराम जी नै राजे गी मारी
 ओड़ेआ । राजे दी दस हजार सैना डरदी नस्सी गई ।
 जमदग्नि ने परशुरामजी गी आखेआ—तूँ राजा दी हत्या करिए
 बड़ा पाप कीता ए । नाढ़ा प्राचित कर । तीर्थें गी जा ।
 पिता दे आखने उपपर परशुराम जी तीर्थें गये उठी । बरे
 परेन्त परतोए । इक दिन परशुराम जी दी मा रेणुका
 ऋषि दे पूजा पाठा गीतैं जल आनन गंगा गई । गंगा कण्डे
 इक गन्धर्व अपनी इस्त्रिएं कन्हें पानी बिच खेडां करा करदा

हा । रेणुका उन्दी खड़े दिक्खन लगी पई ते उसी चिर होई गेआ । जिसलै उसी चेता आया जे ऋषि जी गो पूजा बिच चिर होई गेआ ऐ, तां ओ डरदी डरदी आश्रमै गो परतोई । आनिऐ गडवी उसनै ऋषि जी दे सामनै रक्खी ओड़ी, ते चुप करिए खड़ोई गई । चिर लगने करी महान्कोधी मुनि बड़े रोएँ होए उन्हें बारी बारी सारे पुत्तारें गो आखेआ जे माऊ दी मुण्डी बड्डी ओड़ी । परशुराम जी दे बाकी आ ते नईं मन्ने पर परशुराम जी नै पिता दा हुकम सुनदे गै माऊ दा ते आएँ दा सिर बड्डी ओड़ेआ । जमदग्नि होरें प्रसन्न होइऐ उसी बर संगने गो आखेआ । परशुराम जी नै ए बर संगेआ जे मा ते आ मुड़िए जीन्दे होई जान पर उनें गो ए चेता नईं रबै जे उन्दा सिर बड्डीआ हा । जमदग्नि जी दे तपोबल कर्ने सारे जीन्दे होई गे ।

इक दिन परशुराम जी ते उन्दे आ बनै गो गेदे हे । इन्ने बिच सहस्रबाहु अर्जुन दे पुत्तार आश्रमै बिच आई गे ते बदला कढने गो उनें जमदग्नि गो इक्कले दिक्खिए नुआड़ा सिर बड्डी ओड़ेआ । रेणुका रोन पिट्टन ते कलान लगी ।

परशुराम जी परतोईए आवा करदे हे । माऊ दा रोना
 सुनदे गे भट आश्रमै बिच पुज्जे । पिता दी हत्या दिक्खिए
 उनें गी जुड चढ़ी गेआ । उनें अपना कुहाड़ा चुक्केआ
 ते द्रौड़े । महिष्मती तोड़ी पुजदे उनें सारे राजकमारें गी
 मारी ओड़ेआ । फी बी उन्दा रोह नईं ढलेआ । उनें
 तुप्पी तुप्पी इक्की वारी दुष्ट राजें गी मारेआ ते पृथ्वी दा
 भार हल्का कीता ।

इस हत्या दा पाप धोने लईं उनें इक बड़ा जग्ग कीता ।
 दक्खना बिच सारी धरती ब्राह्मणें गी दान करी ओड़ी ।
 ओ बेन्याईं दे खिलाफ डटी जन्दे हे ।

ओ अपनी बीरता ते निडरता करी अमर न ।




राजा रन्ति देव दी कथा

चन्दर बन्सी राजें बिच रन्तिदेव होर बड़े सन्दोखी ते दानी राजा होए न । उने सैकड़े जग कीते जिन्दे बिच हजारों वेद पाठी ब्राह्मण दूरा दूरा दा आये । राजा ने उने ब्राह्मणों की सुन्ना, रतन ते सज्जी दियां दुध देने आलीयां गवां दान दइए प्रसिन्न कीता । उन्दे जग्गा बिच्चा कोई बी नराश नईं गोआ । उने दुध ते घिओ दियां नदियां बगाई ओढ़ियां । खाने पीने दी बस्तें दे पहाड़ चिनी ओढ़े । चौने कूटें राजे दा जस होन लगा । राजा रन्तिदेव नै अपने विरोधियें की हराया ते मित्तरें की

खुश कीता । ईआं रन्तिदेव नै अपनी सारी धन सम्पदा
 गरीबें, थोड़-बन्दें, ते ब्राह्मणें गी बण्डी ओड़ी । नुआड़े कश
 कक्ख नईं रेआ । इत्थु तोड़ी जे अठताली दिन उनें गी ते
 उन्दे टब्बरें गी नाजै दा दाना तोड़ी नईं थोआ । अनुंजमे
 दिन बड्डे बेलै इक आदमी थाली'च खीर पाइए ते लोटे
 बिच जल लइए राजा कोल गेआ । राजा भुख ते तृषा
 कन्नै व्याकल होआ करदा हा । ओदा धड़ कम्बा करदा
 हा । राजा नै टब्बरा बिच सब किश बण्डेआ ते अपना
 हिस्सा खान गै लगा हा जे नुआड़े धोरजै दी परीक्षा लैने
 गीतै ब्रह्मा जी इक ब्राह्मणै दा रूप धारिए भोजन मंगन
 आई गे । राजे नै खीरै दा अपना हिस्सा ब्राह्मणै गी दई
 ओड़ेआ । ओ खाइए ब्राह्मण गेआ उठी । बची दी खीर
 टब्बर रलिए खान लगा तां विष्णु भगवान शूदरै दा रूप
 धारिए ते मते सारे कुत्ते लइए आईगे ते भोजन मंगन लगे ।
 राजा नै अतिथि समझिए टब्बरे दा हिस्सा उस शूदरै गी
 दई ओड़ेआ । शूदर अपने कुत्ते कनें ओ भोजन खाइए
 गेआ उठी । राजा शड़ा जल पीए त्रेह मटान लगा ते

इन्ने'च महादेव जी चण्डाल दा रूप धारिए आइगे ते
 ते आखन लगे—राजा, मिगी बड़ी त्रेह लग्गी दी ऐ ।
 थोड़ा नेआ पानीं पिलाओ । राजा दयालु हा आखन लगा
 मिकी अपने कष्ट दी पर्वाह नई । अऊं भायें भुक्खा
 तर्याआ मरी जां पर दूएँ दे कष्ट दूर करना मेरा धर्म ऐ । ए
 आखिए राजे नै बचें दा पानी उस चण्डाल गी दई ओड़ेआ ।
 राजे दा धीरज ते दान दिखिए त्रैवै देवता अपने असली
 रूप बिच प्रगट होए । ते राजे गी बरदान मंगने आस्तै
 आखन लगे । राजे ने भगवान दी भगती ते किरपा दे
 अतिरिक्त होर किश नई मंगेआ । इस चाली इस संदोखी
 राजा रन्तिदेव दा जस सारे लोक गान्दे न ।



राजा शिवि दी कथा

राजा शिवि ने सगन्ध खादी दी ही जे जेड़ा बी दुखी
प्राणी ओदी शरण आई जाग ओ जान देईए बी ओदा कष्ट दूर
करडन । उंदी धाक दूर दूर तकर जाई पुज्जी । इन्दर
देवता नै सोचेआ परीक्षया लैनी चाइदी ऐ । अग्नि गी
कबूतर बनाईऐ ते आपूँ बाजै दा रूप धारिऐ ओ कबूतरै
उप्पर भपटेआ । डरेदा कबूतर सभा दे बिच राजे शिवि दी
गोदा आई डिगा । राजै उसी प्यार कीता ते ओदे डरै दा
कारण पुच्छन गै लगा दा हा जे बाज रूपै च इन्दर सामने आई

खड़ोता ते आखन लगा 'माराज ए मेरा भोजन ऐ मिगी देई ओड़ो नैई ते में भुख्खा मरी जाड ।' शिवि राजा ने आखेआ अऊं अपने शरणागत गी कुसै हालती च बी तुगी नैई देई सकदा । में ते शरणागत दी रख्या करने दी सगन्ध खादी दी ऐ ।

बाज बोलेआ "पर माराज ए बी केड़े पासे दा राजधर्म ऐ जे इक दी तुस रख्या करो ते दूए गी भुख्खा मारी ओड़ो ? अऊं बी ते तुंदी गै प्रजा आं, ते मेरी पालमा करना बी तुन्दा धर्म ऐ । इस करी ए मेरा शकार तुस मिगी देई ओड़ो ।" 'ठीक ऐ तेरी पालमा करना मेरा धर्म ऐ पर जरूरी नैई जे इस्सै कबूतरे दा मास खाईऐ तेरी तृप्ति होई सकदी ऐ । तूं एदे बदले होर किश मंग तुकी उऐ देंड ।" राजा शिवि नै बाजैगी आखेआ । 'माराज मीं आप्पूं गे मारिए शकार खन्ना पर इक गल्ल होई सकदी ऐ जे तुस इसे कबूतरे ते तोलै दा मास मिगी अपने शरीरे चा बड्डी देओ ते ओ खाई सकनां ।

सारे राजदरबारी चुप्प होई. गे पर राजे नै सहज सुभा
कन्ने आखेआ 'मिगी मंजूर ऐ' ।

त्रकड़ी दे इक पासे कबूतर धरिऐ राजा दूए पलड़े बिच
अपना मास बड्डी २ चाढ़न लगा । इक जड बड्डीए चाढ़ी दूई
चाढ़ी फी बांह बड्डीए चाढ़ी ओड़ी पर फी बी कबूतरै आला
फेकड़ा नींदा गे रेआ । ए ते देवतें दी माया ही जे कबूतर
भारा गे भारा हुंदा जा करदा हा । खीरिएं राजा शिवि
अपना सिर बड्डीए चाढ़न लगा तां उस बेलै इंदर देवता नै
प्रगट होईए ओदी बांह फड़ी लेई । कबूतर बी अग्नि देवता
दा रूप धारिऐ उसी अशीरवाद देन लगा, त्रिलोकी च राजा
दी जयजयकार होई ते देवतें मंतर पढ़िऐ राजे दियां जडां
बावां परतिऐ ठीक करी ओड़ियां ।



मार्कण्डेय मुनि

बरसगंडी आलै दिन गोए दा मार्कण्डेय बनाईए पणत ओदी पूजा करांदे न ते जागतेँ गो अशीरवाद दिन्दे न जे उन्दी मार्कण्डेय जिन्नी लम्मी उमर होए । मृकण्डू ऋषि दे पुत्र, ए मार्कण्डेय, इन्नी लम्मी उमरी आले हे जे उनेँ सारे संसारै गो खतम करने आली परलै हुंदी बी दिख्खी पर ओदे चा बी ओ बची निकले । उंदी लम्मी उमर उंदे जोगबल ते तपस्या करी ही ती भगवान कोला बरदानै च मिली दी ही । उंदी तपस्या इन्नी कठन ही जे इन्दर देवता गो बी डर लगन लगी पेआ जे एडी कठन तपस्या करिए कुतै ओ

तुआड़ा इन्द्रासन गे नईं खोई लैन । उन्न उन्दी तपस्या
भंग करने दे बड़े उपा कीते पर मुनि अपने निश्चे कोला
नईं डिगगे । भगवान उंदा अटल निश्चा दिखिए प्रगट होए
ते उनें उसी आखेया 'बर मंग' ।

मार्कण्डेय होरें भगवान दो बड़ी स्तुति कीती ते अरज कीती
जे ओ मार्कण्डेय गो अपनी माया दे चमत्कार दस्सन ।

भगवान हस्से ते आखन लगगे 'मुनि जी मेरी माया बड़ी
डाड्डी ऐ । ए सब्बनें गो अपने जालें च फसाई लेंदी ऐ
ते उऐ एदे कोला बची सकदा ऐ जेदे उप्पर मेरी किरपा
होऐ ।" इत्ना आखिए भगवान ते अन्तरध्यान होई गे ते
मुनि होर बदरिकाश्रम आलें पासें टुरी गे ।

इक दिन मार्कण्डेय होर पुष्पभद्रा नदी दे कनारें बैठे
तपस्या करादे हे । उनें दिखेआ जे घनघोर घटा चढ़ी
आईया न बिजली कड़कन लगी ऐ ते मोले-धार बरखा
बरन लगी पेई ऐ । दिखदे २ गे समुन्दर गर्जन लगा ते
चौनें पासेआ पृथ्वी उप्पर चढ़ी आया । धरती डुब्बी गई ते
मुनि होर लगगे उस लम्मे चौड़े समुन्दरें बिच गोते खान ते

रुढ़न । रुढ़दे २ कुसै मगर मच्छै कन्ने भक्त होई
जा ते कुतै बड़ें २ अजगरें ते नैकानैक दुए समुन्दरी जीवें कन्ने
टकरांदे बचन । कन्ने भुक्खु कन्ने जिन्दू दा डर, मुनि होर
बतेह होई गे । इयां गै रुढ़दे रुढ़दे जुग होई गे । इक
दिन उन्हें दिख्या जे इक पिप्पलै दे पत्तरै उप्पर इक बड़ा
गै शैल निक्का नेआ जागत अपने पैरा दा डूठा चुंगा करदा
हा । ओ हराने होए दे ओदे कोल पुज्जे । जागतै इक्कै
लम्मा साह लेआ ते मुनि होर साह कन्ने खचोए दे ओदे
ढिड्डा च टुरी गे । उत्थें उनें सारी सृष्टि गी सही सलामत
उए नेआ कैम दिखेआ जनेई परलै दे पैले ही । मुनि जी
होर बी भलखोए ते इन्ने चिरै च जागतै साह छोड़ेया ते ओ
फी बाहर आई गे । उन्दे चरजे दी हद्द मुक्की गई जेले
ओने दिख्या जे न कुते समुन्दर हा न परलै नां बदल ते नां
बिजली । ओ पुष्प भद्रा नदी दे कण्डे ध्यान मुद्रा च बैठे दे
हे । उन्हें प्रभु दी माया गी हत्थ जोड़िए नमस्कार कीता ।



गंगा ते भगीरथ

पराने समे दी गल्ल ऐ । सूरज बैसे च सगर नां दा
इक बड़ा प्रतापी राजा राज करदा हा । ओदियां दौं
रानियां हियां । इक रानी दे इक पुत्तर होआ जेदा नां
असमंजस हा ते दुई रानी दे सठ हजार पुत्तर हे । असमंजस
पिछले जन्मे दा कोई जोगभ्रष्ट होए दा जोगी हा इस करिऐ
ओदा राजकाजें च मन नईं लगदा हा । राजा सगर नै

नुग्राड़ा ब्याह बी कराया । ओदे घर अंशुमान नां दा पुतर
 होआ पर ओ ते आखो रस्से त्रोटिए नस्सना चांदा हा ।
 छड़कारे दा होर कोई उपा नई दिखिए असमंजस ने परजा गी
 दुख देना शुरू करी ओड़ेया । इक वारी लोकें दे मते सारे
 जागते गी किट्टे करिए सरजू स्नान दे बहाने लेई गया ते
 उत्थें किशती भरिए उनें गी डबरी च डोबी आया । लोक
 रोंदे पिटदे राजा सगर कोल आए । उनें फरयाद सुनिए
 न्यां कीता ते असमंजस गी हमेशा आस्तै देस नकाला देई
 ओड़ेया । असमंजस ते इऐ चांदा हा । ओ खुशी २ देसै
 दा चली गया पर जंदे २ अपने जोगबलै कन्ने सारे डुब्बे दे
 बच्चें गी नदी चा सही सलामत कडुी गया । लोक बड़े
 खुश ते हरान होए पर असमंजस हुन वापस थोड़ा औंदा हा ।

ताईं उनें दिनें बाहरलें देसैं दे तालजंघ बर्बर, यवन,
 शक, हैहय आदि कई लोक साड़े मुखै उपपर चढ़ी २ आवा
 करदे हे । राजा सगर नै सब्बनै शत्रुएँ गी मारिए नसाई
 ओड़ेया ते आपूँ चक्रवर्ती राजा बनी गया । हुन ओदी
 इच्छया होई जे ओ सौ अश्वमेध यज्ञ करिए सुरगै दा राज

बी प्राप्त करे । पर इन्दर देवता कदें कुसे दे सौ जग पूरे
नैई होन दिदा । मत ओदा कदें इन्द्रासन खसोई जा इस
करी ओ जरूर विघ्न पाई ओड़दा ऐ ।

राजा सगर ने नदीनमें अश्वमेध ते करी लैते । इन्द्र दी
कोई चाल सफल नई होई । जिसलै उन्न सौमें अश्वमेध जग
दा घोड़ा छोड़या इन्दर ने ओ घोड़ा चराईऐ कपिल मुनि दे
आश्रमै च जाई बन्नी ओड़या । महाराजा सगर दे दस
हजार पुत्तर घोड़ा तुपदे २ कपिल मुनि दे आश्रमै च पुज्जे
उनें दिख्या जे ऋषि होर समाधी च मगन होए दे न ते घोड़ा
उंदे बागै च चरा करदा ऐ । उनें समझेया जे ए कोई
पखंडी राजा ऐ, घोड़ा चराईऐ हुन बचने दी खातर समाधी
दा पखंड करिऐ बैठा दा ऐ । उनें जोरेयां उसी भुनकेया ।
कपिल देव हुंदी जुगें दी लग्गी दी समाधी त्रुट्टी ते उंदिएं
अखिएं चा अग्नी दे लोरे निकलन लेई पे । सठ हजार
राजकमार जलिए भस्म होई गे ।

मता चिर होई गेया । राजकमारें दी कोई खबर नैई
आई । सगर होरें अपने पोत्रे अंशुमान गी भेजेया । ओ

सठ हजार चाचें दे रथें दी घास दिखदा २ उत्थे जाई पुज्जा
जित्थें ओदे चाचें दी मरतूड़े दा ढेर लगा दा हा । ओ
सब किश समझी गया । बड़ा बुद्धिमान हा । उन्न सेवा
करिए कपिल देव होरें गी प्रसिन्न कीता ते अकाल मृतु
मोए दे चाचें दी मुक्ति दा उपा पुच्छेया । कपिल होरें
आखेया 'जे पृथ्वी उप्पर गंगा जी आई जान तां इन्दी मुक्ति
होई सकदी ऐ । पर गंगा जी गी भूमि उप्पर आनने गीते
बड़ी कठन तपस्या करनी पौन्दी ऐ ।' अंशुमान आखन
लगा अऊं पूरा जतन करंड' । ते फी ओ कपिल हुंदी
आज्ञा कन्ने घोड़ा लेईए घर आया ते दादे गी सारी गल्ल
सनाई ।

महाराजा सगर बड़े दुखी होए सारा राजपाट अंशुमान
गी देईए जंगलें दा रस्ता फगड़ेया ओ बड़ा चिर तप करदे
रे पर गंगा जी गी औने गीते अजें मता चिर हा । सगर
होर देह त्याग करिए सुरग टुरी गे ।

ताईं अंशुमान नै अपने पुत्र दिलीप गी राज दित्ता ते
आपू गंगा जी आस्तें तप करन चली गे । इयां गै दिलीप नै


बी ए परंपरा कायम रखी पर कोई बी कामयाब नैई होआ ।
 खीरिएं भगीरथ हुंदी बारी आई, उनें अपनी बालड़ी बेसा
 च गै गंगा जी आस्तै जतन करने शुरु करी ओड़े । उन्न
 बड़ी कठन साधना कीती, ब्रह्मा जी परसिज्जले ते प्रगट
 होईए आखन लगे जे में गंगा जी गो भूमि आले पासै मोड़ां
 ते सई पर इंदा बेग सहारने दो समर्था सवाये शिवें दे होर
 कुसै च नैई । पैलें शिवें गो मनाओ तां फी कम्म बनी
 सकदा ऐ । हुन भगीरथ होर शिवें दी अराधना करन लगे
 शिवें प्रसिन्न होईए अपने जटा जूटें उप्पर गंगा दा बेग रोकने
 दा बचन दित्ता ते फिरी ब्रह्मा जी नै गंगा जी गो छोड़ी
 ओड़ेया ते ओ पैलें शिवें दे जटाजूटें च डिगगी पेई फी
 उत्थुआं निकलिए कई देसैं मुलखें गो पवित्तर करदे करदे
 कपिल मुनि दे आश्रमैं च सगर दे पुत्तरें दी मर्तूड़ सलिए
 समुद्रे च जाई पेई । भगीरथ पूरे रस्ते गंगा जी दे कन्ने
 रथै उप्पर सवार होईए चलदा गया ते इस चाली अपने
 सारे पितरें गो मुक्ति दइए ऐ सारे देसैं गो गंगा जी दा
 अमर ते मुख समृद्धि कन्ने भरे दा बरदान देईए अमर होई

गेया । जदू तक ए पृथ्वी रौग तां तक भगीरथ दी साधना दी
 ए नशानी देसबासिएं गी ओदा चेता करांदी रौग । जुग
 होई गे न इस गल्लै गी पर अज्ज बी भगीरथ हुंदी जादगारै
 च मकर संग्रादी आलै दिन गंगा सागरै उप्पर मेला
 लगदा ऐ ।



हमारे प्रकाशन

1. त्रिवेणी (डोगरी)
(डोगरी भाषा संस्कृति ते साहित्य)
ले. शक्ति शर्मा, श्यामलाल शर्मा
2. भागवत दियां कथां (डोगरी)
ले. श्यामलाल शर्मा
3. प्रेमनाथ डोगरा (हिन्दी)
(एक व्यक्तित्व)
ले. श्यामलाल शर्मा



आगामी प्रकाशन

4. बताल पचीसी (डोगरी)
श्यामलाल शर्मा
5. लोक कथां (डोगरी)
श्यामलाल शर्मा
6. डोगरी शब्दकोश (डोगरी-हिन्दी उर्दू)
श्यामलाल शर्मा

श्रीपति प्रकाशन

195 विजय गढ़, जम्मू ।